

O‘ZBEKISTON RESPUBLIKASINING QONUNI

“BANKLAR VA BANK FAOLIYATI TO‘G‘RISIDA”GI O‘ZBEKISTON RESPUBLIKASI QONUNIGA O‘ZGARTISH VA QO‘SHIMCHALAR KIRITISH HAQIDA

Qonunchilik palatasi tomonidan 2019-yil 22-iyulda qabul qilingan
Senat tomonidan 2019-yil 11-oktabrda ma’qullangan

1-modda. O‘zbekiston Respublikasining 1996-yil 25-aprelda qabul qilingan “Banklar va bank faoliyati to‘g‘risida”gi 216-I-sonli Qonuniga (O‘zbekiston Respublikasi Oliy Majlisining Axborotnomasi, 1996-yil, № 5-6, 54-modda; 1997-yil, № 2, 56-modda, № 9, 241-modda; 1999-yil, № 5, 124-modda, № 9, 229-modda; O‘zbekiston Respublikasi Oliy Majlisi palatalarining Axborotnomasi, 2006-yil, № 9, 491-modda, № 10, 536-modda; 2008-yil, № 12, 640-modda; 2009-yil, № 4, 133-modda, № 9, 337-modda; 2012-yil, № 4, 105-modda; 2013-yil № 4, 98-modda; 2017-yil, № 9, 510-modda; 2018-yil, № 4, 224-modda, № 10, 670-modda; 2019-yil, № 1, 5-modda) o‘zgartish va qo‘shimchalar kiritilib, uning yangi tahriri tasdiqlansin (*ilova* qilinadi).

2-modda. O‘zbekiston Respublikasi Vazirlar Mahkamasi:
hukumat qarorlarini ushbu Qonunga muvofiqlashtirsin;
davlat boshqaruvi organlari ushbu Qonunga zid bo‘lgan o‘z normativ-huquqiy hujjatlarini qayta ko‘rib chiqishlari va bekor qilishlarini ta’minlasin;
ushbu Qonunning ijrosini, ijrochilarga yetkazilishini hamda mohiyati va ahamiyati aholi o‘rtasida tushuntirilishini ta’minlasin.

3-modda. Ushbu Qonun rasmiy e’lon qilingan kundan e’tiboran kuchga kiradi.

O‘zbekiston Respublikasining Prezidenti Sh. MIRZIYOYEV

Toshkent sh.,
2019-yil 5-noyabr,
O‘RQ-580-son

O‘ZBEKISTON RESPUBLIKASINING QONUNI

Banklar va bank faoliyati to‘g‘risida

(yangi tahriri)

1-bob. Umumiy qoidalar

1-modda. Ushbu Qonunning maqsadi

Ushbu Qonunning maqsadi bank faoliyati sohasidagi munosabatlarni tartibga solishdan iborat.

Oldingi tahrirga qarang.

2-modda. Banklar va bank faoliyati to‘g‘risidagi qonunchilik

Banklar va bank faoliyati to‘g‘risidagi qonunchilik ushbu Qonun va boshqa qonunchilik hujjatlaridan iboratdir.

Agar O‘zbekiston Respublikasining xalqaro shartnomasida O‘zbekiston Respublikasining banklar va bank faoliyati to‘g‘risidagi qonunchiligida nazarda tutilganidan boshqacha qoidalar belgilangan bo‘lsa, xalqaro shartnoma qoidalari qo‘llaniladi.

(2-modda O‘zbekiston Respublikasining 2021-yil 21-apreldagi O‘RQ-683-sonli Qonuni tahririda — Qonunchilik ma’lumotlari milliy bazasi, 21.04.2021-y., 03/21/683/0375-son)

3-modda. Asosiy tushunchalar

Ushbu Qonunda quyidagi asosiy tushunchalar qo‘llaniladi:

Oldingi tahrirga qarang.

ariza beruvchi — muassis (muassislar) tomonidan bank tashkil etish bo‘yicha uning (ularning) manfaatlarini O‘zbekiston Respublikasi Markaziy bankida ifodalash uchun vakil qilingan

shaxs yoki ushbu Qonunga muvofiq o'z faoliyatini o'zgartirish maqsadida O'zbekiston Respublikasi Markaziy bankiga murojaat etgan bank yoxud mikromoliya tashkiloti;

(3-modda O'zbekiston Respublikasining 2025-yil 11-fevraldagi O'RQ-1026-sonli Qonuniga asosan ikkinchi xatboshi bilan to'ldirilgan — Qonunchilik ma'lumotlari milliy bazasi, 12.02.2025-y., 03/25/1026/0131-son)

bank — bank hisobvaraqlarini ochish va yuritish, to'lovlarni amalga oshirish, omonatlarga (depozitlarga) pul mablag'larini jalb etish, o'z nomidan kreditlar berish bo'yicha bank faoliyati sifatida aniqlangan operatsiyalar majmuini amalga oshiruvchi tijorat tashkiloti bo'lgan yuridik shaxs;

banklar guruhi — moliya institutlarining yuridik shaxs bo'lmagan birlashmasi bo'lib, bunda asosiy bank boshqa moliya institutlarini nazorat qiladi;

bank hisobvarag'i — bank tomonidan shartnomaga muvofiq mijozga ochilgan hisobvaraq bo'lib, unga ko'ra bank mijozning hisobvarag'iga tushayotgan pul mablag'larini qabul qilish va hisobga kiritish, mijozning hisobvarag'idan tegishli pul mablag'larini o'tkazish hamda berish va hisobvaraq bo'yicha boshqa operatsiyalarni amalga oshirish haqidagi topshiriqlarini bajarish majburiyatini zimmasiga oladi;

bankning barqaror moliyaviy holati — bankning moliyaviy oqimlar mutanosibligini, to'lov qobiliyatini, likvidiligi va rentabelli faoliyatini saqlab turish uchun mablag'larning yetarliligini, shuningdek barcha prudensial normativlar bank tomonidan bajarilishini ifodalovchi holati;

bilvosita egalik qiluvchi (oluvchi) — bankning aksiyalariga o'zi nazorat qiladigan boshqa shaxs orqali egalik qiluvchi (aksiyalarni oluvchi) shaxs;

Oldingi tahrirga qarang.

mikromoliya banki — ushbu Qonunning 7-moddasida nazarda tutilgan cheklovlarni inobatga olgan holda o'z faoliyatini amalga oshiruvchi bank. Agar ushbu Qonunda boshqacha qoida nazarda tutilmagan bo'lsa, ushbu Qonunning banklarga nisbatan belgilangan qoidalari mikromoliya banklariga nisbatan ham tatbiq etiladi;

(3-modda O'zbekiston Respublikasining 2025-yil 11-fevraldagi O'RQ-1026-sonli Qonuniga asosan sakkizinchi xatboshi bilan to'ldirilgan — Qonunchilik ma'lumotlari milliy bazasi, 12.02.2025-y., 03/25/1026/0131-son)

muhim ahamiyatga ega xodimlar — bankning boshqaruv a'zolari bo'lmagan, lavozimi bank faoliyatiga muhim ta'sir ko'rsatish imkoniyatini beradigan xodimlari;

mo'ljallangan olish — potensial oluvchi tomonidan bank aksiyalarini olish yoki ularga hal qiluvchi egalik qilishni ko'paytirish yuzasidan qabul qilingan qaror;

oxirgi benefitsiar mulkdor — yuridik shaxs bo'lgan, bank aksiyalarining potensial oluvchisiga yoki bu aksiyalarga bevosita yoxud bilvosita egalik qiluvchiga bevosita yoki bilvosita egalik qiladigan yoxud uni nazorat qiladigan jismoniy shaxs;

prudensial nazorat — bank faoliyatining o'ziga xos tavakkalchiliklarining oldini olish va kamaytirish maqsadida banklar faoliyati ustidan O'zbekiston Respublikasi Markaziy banki amalga oshiradigan nazorat;

regulyativ kapital — bank faoliyatini tartibga solish va prudensial normativlar hisob-kitobini amalga oshirish maqsadida hisob-kitob qilish yo'li bilan aniqlanadigan bank kapitali;

tizimli ahamiyatga molik bank — bank tizimining barqarorligi qaysi bankning faoliyatiga bog'liq bo'lsa, o'sha bank;

Oldingi tahrirga qarang.

chet el banki — chet davlatning hududida ro'yxatga olingan, uning qonunchilikka muvofiq bank deb hisoblanadigan yuridik shaxs;

(3-moddaning o'n uchinchi xatboshisi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

hal qiluvchi egalik — shaxs tomonidan yoki birgalikda harakat qiluvchi shaxslar tomonidan yuridik shaxs ustav fondining (ustav kapitalining) bir yoxud bir necha bitim natijasida olingan kamida besh foiziga bevosita yoki bilvosita egalik qilish.

4-modda. Bank faoliyati sohasini tartibga soluvchi davlat organi

O'zbekiston Respublikasi Markaziy banki (bundan buyon matnda Markaziy bank deb yuritiladi) bank faoliyati sohasini tartibga soluvchi va litsenziyalash, tartibga solish hamda prudensial nazorat bo'yicha vakolatlarni amalga oshiruvchi davlat organidir.

Oldingi tahrirga qarang.

5-modda. Banklarning moliyaviy operatsiyalari

(5-moddaning nomi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Banklar tomonidan amalga oshiriladigan moliyaviy operatsiyalar jumlasiga quyidagilar kiradi:

pul mablag'larini omonatlarga (depozitlarga) jalb etish;
to'lovlarni amalga oshirish, shu jumladan bank hisobvaraqlarini ochmasdan amalga oshirish;

jismoniy va yuridik shaxslarning bank hisobvaraqlarini, shu jumladan banklarning vakillik hisobvaraqlarini ochish hamda yuritish;

kreditlarni ularning qaytarilishi, foizlilik va muddatliligi sharti bilan o'z nomidan o'zining mablag'lari hamda jalb etilgan mablag'lar hisobidan berish;

chet el valyutasi bilan naqd va naqdsiz shakllardagi operatsiyalar;

Oldingi tahrirga qarang.

jismoniy yoki yuridik shaxs bilan tuzilgan shartnoma bo'yicha pul mablag'larini va boshqa mol-mulkni ishonchli boshqarish;

(5-modda birinchi qismining yettinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

inkassatsiya va kassa xizmatlarini ko'rsatish;

uchinchi shaxslar nomidan ularning majburiyatlari bajarilishini nazarda tutuvchi kafolatlar berish va boshqa majburiyatlarni qabul qilish;

uchinchi shaxslardan pul shaklidagi majburiyatlarning bajarilishini talab qilish huquqini olish (faktoring);

qimmatli qog'ozlarni chiqarish, xarid qilish, sotish, ularning hisobini yuritish va ularni saqlash, mijoz bilan tuzilgan shartnomaga binoan qimmatli qog'ozlarni boshqarish, ular bilan boshqa operatsiyalarni bajarish;

affinlangan qimmatbaho metallar sotib olish va sotish, shu jumladan metallarni mas'ul saqlash hisobvaraqlarini hamda metallarning egasizlantirilgan (jismoniy bo'lmagan) hisobvaraqlarini yuritish;

qimmatbaho metallardan yasalgan tangalarni sotib olish va sotish;

hosilaviy moliya vositalari (derivativlar) bilan operatsiyalarni amalga oshirish;

hujjatlarni yoki qimmatliklarni saqlash uchun maxsus binolarni yoki ularning ichidagi seyflarni ijaraga berish;

lizing berish;

Oldingi tahrirga qarang.

qonunchilikda nazarda tutilgan shakllarda qarzlarni berish;

(5-modda birinchi qismining o'n yettinchi xatboshisi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

moliyaviy operatsiyalar bilan bog'liq maslahat xizmatlari ko'rsatish;

aktivlar majmuini (portfelini) boshqarish;

elektron pullarni chiqarish, ulardan foydalanish va to'lash;

bank kartalarini berish va to'lovlarga ishlov berish, bank kartalariga boshqa tashkilotlar, jumladan boshqa moliya institutlari bilan birgalikda xizmat ko'rsatish;

Oldingi tahrirga qarang.

ko'chmas mulkka bo'lgan huquqlarni davlat ro'yxatidan o'tkazish bo'yicha xizmatlarni ro'yxatdan o'tkazuvchi organ bilan elektron axborot almashish orqali ko'rsatish.

(5-moddaning birinchi qismi O'zbekiston Respublikasining 2025-yil 11-fevraldagi O'RQ-1026-sonli Qonuniga asosan yigirma ikkinchi xatboshi bilan to'ldirilgan — Qonunchilik ma'lumotlari milliy bazasi, 12.02.2025-y., 03/25/1026/0131-son)

Oldingi tahrirga qarang.

Banklar banklar va bank faoliyati to'g'risidagi qonunchilikka muvofiq boshqa moliyaviy operatsiyalarni ham amalga oshiradi.

(5-moddaning ikkinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Oldingi tahrirga qarang.

(5-moddaning uchinchi qismi O'zbekiston Respublikasining 2025-yil 11-fevraldagi O'RQ-1026-sonli Qonuniga asosan chiqarilgan — Qonunchilik ma'lumotlari milliy bazasi, 12.02.2025-y., 03/25/1026/0131-son)

6-modda. Omonat (depozit)

Quyidagi shartlarning barchasiga muvofiq bo'lgan, qo'yilgan pul mablag'lari omonatdir (depozitdir):

mijozning talabiga binoan yoki muddat o'tganidan keyin foizlar yoxud boshqa daromadlar bilan yoki ularsiz yoxud omonatchi yoki uning vakolatli vakili va pul mablag'larini qabul qiluvchi bank o'rtasida, kelishilgan shartlar asosida qaytarilishi lozim bo'lgan pul mablag'lari;

subordinar qarzga, egalik qilish huquqlariga yoki xizmatlariga, shu jumladan sug'urta xizmatlariga taalluqli bo'lmagan pul mablag'lari;

pul mablag'larini qabul qiluvchi bankning tegishli hujjati bilan yozma shaklda tasdiqlangan pul mablag'lari.

Pul mablag'larini omonatlarga (depozitlarga) jalb etish bo'yicha faoliyat bilan shug'ullanishga faqat banklar haqli.

7-modda. Banklar uchun taqiqlangan yoki cheklangan faoliyat

Oldingi tahrirga qarang.

Banklar bevosita ishlab chiqarish, savdo, sug'urta faoliyati hamda banklar va bank faoliyati to'g'risidagi qonunchilikda nazarda tutilgan moliyaviy operatsiyalarni amalga oshirish bilan bog'liq bo'lmagan boshqa faoliyat bilan shug'ullanishga haqli emas.

(7-moddaning birinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Ushbu moddaning **birinchi qismida** ko'rsatilgan cheklov quyidagi hollarga nisbatan tatbiq etilmaydi:

bank kartalari asosida naqd pulsiz hisob-kitoblar tizimlarida foydalaniladigan ixtisoslashtirilgan uskunani va unga doir dasturiy ta'minotni sotish yoki ijaraga berishga;

o'z aktivlarini sotishga;

chek daftarchalarini chiqarish, realizatsiya qilish va tarqatishga;

sug'urta tashkilotlari bo'lgan O'zbekiston Respublikasi rezidentlari nomidan sug'urta shartnomasi tuzilishini tashkil etish bo'yicha faoliyatni amalga oshirishga;

bank o'zi muassis bo'lgan yuridik shaxslarga o'z mol-mulkini mulkiy ijara (arenda) shartnomasiga muvofiq ijaraga berishga.

Oldingi tahrirga qarang.

Mikromoliya banklari ushbu moddaning birinchi qismida ko'rsatilgan cheklovlardan tashqari quyidagilarni inobatga olgan holda o'z faoliyatini amalga oshiradi:

bir jismoniy shaxsdan omonatga jalb qilingan pul mablag'lari miqdori banklardagi omonatlarni himoya qilish kafolatlari to'g'risidagi qonunchilikda belgilangan kafolatlangan omonat miqdoridan oshmasligini;

bir qarz oluvchi yoki o'zaro aloqador qarz oluvchilar guruhiga doir tavakkalchilikning eng ko'p miqdori besh milliard so'mdan oshmasligini;

tadbirkorlik faoliyatini amalga oshirish va o'zini o'zi band qilgan shaxslarning daromad olishga yo'naltirilgan faoliyati uchun berilgan kreditlarning kredit portfelidagi ulushi yetmish foizidan kam bo'lmasligini;

chet el banklarida vakillik hisobvaraqlari va boshqa hisobvaraqlar ochish, chet el fuqarolarining va yuridik shaxslarining majburiyatlari bo'yicha kafolatlar berish hamda mijozlarning tashqi savdo operatsiyalari bo'yicha xizmatlar ko'rsatish taqiqlanganligini;

qarz qimmatli qog'ozlariga investitsiyalar banklarning likvidligini boshqarishga doir talablar doirasida faqat Markaziy bank tomonidan belgilangan yuqori likvidli qarz qimmatli qog'ozlariga qilinishini.

(7-modda O'zbekiston Respublikasining 2025-yil 11-fevraldagi O'RQ-1026-sonli Qonuniga asosan uchinchi qism bilan to'ldirilgan — Qonunchilik ma'lumotlari milliy bazasi, 12.02.2025-y., 03/25/1026/0131-son)

Banklarga yuridik shaxslarni tashkil etish va (yoki) yuridik shaxslarning ustav fondlaridagi (ustav kapitalidagi) ulushlarni yoki aksiyalarni olish taqiqlanadi, bundan quyidagilar mustasno:

kredit, sug'urta va lizing operatsiyalarini professional asosda amalga oshiruvchi yuridik shaxslar;

moliya bozori infratuzilmasining bir qismi bo'lgan yoki banklarga axborot va maslahat xizmatlarini ko'rsatuvchi yuridik shaxslar;

qimmatli qog'ozlar bozorida professional faoliyatni amalga oshiruvchi yuridik shaxslar;

bankning kafolati ostida qimmatli qog'ozlarni chiqarish va joylashtirish maqsadida mazkur bankning xorijda tashkil etiladigan shu'ba tashkilotlari;

faqat inkassatsiya faoliyati bilan shug'ullanuvchi yuridik shaxslar;

bank operatsiyalari bo'yicha hisob-kitoblar, shu jumladan bank kartalari bilan operatsiyalarga doir hisob-kitoblar ishtirokchilari o'rtasida o'zaro bog'liqligini ta'minlash bo'yicha xizmatlar ko'rsatuvchi yuridik shaxslar;

fond va valyuta birjalari;

kredit byurolari;

qimmatli qog'ozlarning ikkilamchi bozoriga joylashtirilgan aksiyalarning yigirma foizidan ortiq bo'lmagan miqdorda fond birjasi listingiga kiritilgan aksiyadorlik jamiyatlari.

Oldingi tahrirga qarang.

Ushbu moddaning **to'rtinchi qismiga** muvofiq bank tomonidan bir yuridik shaxsning ustav fondidagi (ustav kapitalidagi) ulushlarini yoki aksiyalarini olish bankning birinchi darajali regulyativ kapitalining o'n besh foizidan oshmasligi kerak. Ushbu cheklov bank tomonidan mazkur yuridik shaxslarning ustav fondidagi (ustav kapitalidagi) ulushlariga yoki aksiyalariga egalik qilishga, shu jumladan mazkur yuridik shaxslarning tashkil etilishi hollariga nisbatan ham tatbiq etiladi.

(7-moddaning beshinchi qismi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Oldingi tahrirga qarang.

Yuridik shaxslarning ustav fondidagi (ustav kapitalidagi) ulushlarini yoki aksiyalarini sotib olish yig'indisi bankning birinchi darajali regulyativ kapitalining ellik foizidan oshmasligi kerak.

(7-moddaning oltinchi qismi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Oldingi tahrirga qarang.

Agar bank tomonidan yuridik shaxslar ustav fondidagi (ustav kapitalidagi) ulushlariga yoki aksiyalariga egalik qilish ushbu moddaning **beshinchi** va **oltinchi qismlarida** ko'rsatilgan miqdordan ortiq bo'lsa, ushbu ortgan qismni bank bir yil ichida sotishi shart.

(7-moddaning yettinchi qismi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Bankka ushbu bank ustav kapitalining bir yoki undan ortiq foiziga egalik qiluvchi yuridik shaxsning ustav fondida (ustav kapitalida) ishtirok etish taqiqlanadi.

Ushbu moddaning talablari banklar tomonidan boshqa bankning aksiyalarini yoki o'zga bank saqlovchisi bo'lgan boshqa qimmatli qog'ozlarni yoxud o'zga bankka tegishli yuridik shaxslar ustav fondidagi (ustav kapitalidagi) ulushlarni yoki aksiyalarni ular tomonidan qo'shib yuborish yoki qo'shib olish shaklida qayta tashkil etish amalga oshirilayotganda olish hollariga nisbatan tatbiq etilmaydi.

8-modda. Banklarning mustaqilligi

Banklar moliyaviy operatsiyalarni amalga oshirish bilan bog'liq qarorlar qabul qilishda mustaqildir.

Davlat organlari va ularning mansabdor shaxslariga banklar faoliyatiga, shu jumladan banklarning kredit portfelini va aktivlarini shakllantirish bilan bog'liq tadbirkorlik tavakkalchiliklarini boshqarishga, banklarning rahbar xodimlarini tayinlashga aralashish, shuningdek bankning mablag'lari hisobidan turli xil to'lovlar va badallar talab qilish taqiqlanadi, bundan ushbu Qonunda nazarda tutilgan hollar mustasno.

9-modda. Davlat va banklar majburiyatlarining chegaralab qo'yilishi

Banklar davlatning majburiyatlari bo'yicha, davlat esa banklarning majburiyatlari bo'yicha javob bermaydi, bundan banklarning yoki davlatning o'zi bunday majburiyatlarni zimmasiga olish hollari mustasno.

10-modda. Banklarning uyushmalari

Oldingi tahrirga qarang.

Banklar, agar qonunchilikning talablariga zid kelmasa, o'zining umumiy manfaatlarini himoya qilish hamda birgalikdagi dasturlarni amalga oshirish maqsadida uyushmalar va boshqa birlashmalar tuzishi mumkin.

(10-moddaning birinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Banklarning uyushmalari axborot almashish va bank faoliyatini amalga oshirish bilan bog'liq boshqa masalalarni birgalikda hal qilishga doir tashkilotlarni tashkil etishi mumkin.

Banklarning uyushmalari vakolatli davlat organi tomonidan ro'yxatga olinganidan yoki tugatish to'g'risidagi qaror qabul qilinganidan keyin Markaziy bankni bu haqda o'n kunlik muddatda xabardor etadi.

11-modda. Bankning nomi

Oldingi tahrirga qarang.

“Bank” atamasidan yoki mazkur atama qo'shib yasalgan so'z birikmalaridan faqat Banklarning davlat reyestriga kiritilgan yuridik shaxslar tomonidan firma nomida yoxud tovar belgisida (xizmat ko'rsatish belgisida) yoki Internet jahon axborot tarmog'ining “UZ” domen zonasida foydalaniladi.

(11-moddaning birinchi qismi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Oldingi tahrirga qarang.

Bank faoliyatini amalga oshirish huquqini beruvchi litsenziyaga ega bo'lgan yuridik shaxslar “bank” yoki “mikromoliya banki” atamasini o'zining firma nomiga qo'shishi shart.

(11-moddaning ikkinchi qismi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

12-modda. Bankning muassislari

Yuridik va jismoniy shaxs bo'lgan rezidentlar, shuningdek norezidentlar bank muassislari bo'lishi mumkin.

Oldingi tahrirga qarang.

Davlat O'zbekiston Respublikasi Moliya vazirligi, shuningdek O'zbekiston Respublikasi Prezidenti qarorlari asosida boshqa davlat tashkilotlari nomidan bank muassisi va aksiyadori bo'lishi mumkin. Ustav fondining (ustav kapitalining) ellik foizdan ortig'i davlatga tegishli bo'lgan

korxonalar va tashkilotlar, agar qonunchilikda boshqacha qoida nazarda tutilmagan bo'lsa, bank muassislari va aksiyadorlari bo'lishi mumkin emas.

(12-moddaning ikkinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

13-modda. Bankning ustav kapitali

Oldingi tahrirga qarang.

Oldingi tahrirga qarang.

Bankning, bundan mikromoliya banki mustasno, ustav kapitalining eng kam miqdori:

(13-modda birinchi qismining birinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Oldingi tahrirga qarang.

(13-modda birinchi qismining ikkinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuniga asosan chiqarilgan — Qonunchilik ma'lumotlari milliy bazasi, 12.02.2025-y., 03/25/1026/0131-son)

Oldingi tahrirga qarang.

(13-modda birinchi qismining uchinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuniga asosan chiqarilgan — Qonunchilik ma'lumotlari milliy bazasi, 12.02.2025-y., 03/25/1026/0131-son)

2024-yil 1-apreldan e'tiboran uch yuz ellik milliard so'mni;

2025-yil 1-yanvardan e'tiboran besh yuz milliard so'mni tashkil etishi kerak.

(13-moddaning birinchi qismi O'zbekiston Respublikasining 2023-yil 19-apreldagi O'RQ-831-sonli Qonuni tahririda — Qonunchilik ma'lumotlari milliy bazasi, 20.04.2023-y., 03/23/831/0219-son)

Oldingi tahrirga qarang.

Mikromoliya banki ustav kapitalining eng kam miqdori ellik milliard so'mni tashkil etishi kerak.

(13-modda O'zbekiston Respublikasining 2025-yil 11-fevraldagi O'RQ-1026-sonli Qonuniga asosan ikkinchi qism bilan to'ldirilgan — Qonunchilik ma'lumotlari milliy bazasi, 12.02.2025-y., 03/25/1026/0131-son)

Bankning ustav kapitali O'zbekiston Respublikasi milliy valyutasida shakllantiriladi hamda bank muassislari va aksiyadorlari kiritgan pul mablag'laridan yoki davlatning qimmatli qog'ozlaridan tashkil topadi, bundan quyidagi hollar mustasno:

bank aksiyalarini bankning kreditorlari orasida joylashtirish va bankning kreditorlar oldidagi pul majburiyatlari bo'yicha har qanday huquqlarini (talablarini) hisobga olish yo'li bilan ularning haqini to'lash;

qimmatli qog'ozlarni bank aksiyalariga ayirboshlash;

bankning joylashtirilgan bir turdagi aksiyalarini ushbu bankning boshqa turdagi aksiyalariga almashtirish.

Bankning ustav kapitalini shakllantirish uchun kreditga, garovga olingan mablag'lardan, shuningdek majburiyat yuklatilgan boshqa mablag'lardan foydalanishga yo'l qo'yilmaydi.

Oldingi tahrirga qarang.

Oldingi tahrirga qarang.

Tashkil etilayotgan yoki qo'shib yuborish, bo'lish va ajratib chiqarish shaklida qayta tashkil etilayotgan bank ustav kapitali ushbu moddaning birinchi qismida nazarda tutilgan, bank tashkil etilayotgan yoki qayta tashkil etilayotgan kundagi bank ustav kapitalining eng kam miqdoridan kelib chiqqan holda shakllantiriladi. Bunda bank ustav kapitalining eng kam miqdori bankni davlat ro'yxatidan o'tkazish va litsenziya berish to'g'risidagi ariza beriladigan paytgacha bank muassislari tomonidan shakllantirilgan bo'lishi kerak. Tashkil etilayotgan bankning ustav kapitaliga kiritilgan mablag'lar bankda ochilgan jamg'arma hisobvarag'iga o'tkaziladi, bundan bankni qayta tashkil etish yoki mikromoliya tashkiloti faoliyatini o'zgartirish orqali tashkil etish hollari mustasno.

(13-moddaning beshinchi qismi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Oldingi tahrirga qarang.

Mikromoliya tashkiloti faoliyatini o'zgartirish orqali tashkil etilayotgan mikromoliya banking ustav kapitalini to'ldirish uchun mablag'lar mikromoliya tashkilotining hisobvarag'iga kiritiladi.

(13-modda O'zbekiston Respublikasining 2025-yil 11-fevraldagi O'RQ-1026-sonli Qonuniga asosan oltinchi qism bilan to'ldirilgan — Qonunchilik ma'lumotlari milliy bazasi, 12.02.2025-y., 03/25/1026/0131-son)

Banklar ushbu moddaning birinchi qismida belgilangan muddatlarda o'z ustav kapitali miqdorini mazkur moddaning birinchi qismida ko'rsatilgan talablarga muvofiqlashtirishi kerak. Ustav kapitalida davlat ulushi mavjud bo'lgan banklar norezidentlarga davlat ulushini to'liq sotish orqali xususiylashtirilganda Markaziy bank boshqaruvi bank ustav kapitalini mazkur moddaning birinchi qismida belgilangan eng kam miqdorga muvofiqlashtirish bo'yicha belgilangandan boshqa muddatlarni o'rnatishga haqli.

(13-moddaning to'rtinchi qismi O'zbekiston Respublikasining 2023-yil 19-apreldagi O'RQ-831-sonli Qonuniga asosan to'rtinchi va beshinchi qismlar bilan almashtirilgan — Qonunchilik ma'lumotlari milliy bazasi, 20.04.2023-y., 03/23/831/0219-son)

Tizimli moliyaviy inqiroz holatida bank aksiyalari davlat qimmatli qog'ozlari hisobidan O'zbekiston Respublikasi Moliya vazirligi tomonidan sotib olinishi mumkin.

14-modda. Bankning ustavi va ichki nizomlari

Bank o'z ustavi asosida faoliyat ko'rsatadi.

Bank ustavida quyidagilar ko'rsatilishi kerak:

bankning to'liq va qisqartirilgan firma nomi, joylashgan yeri (pochta manzili) hamda elektron pochta manzili;

ustav kapitalining miqdori;

ustav kapitalini ko'paytirish va kamaytirish tartibi;

chiqarilayotgan aksiyalarning turlari va soni, aksiyalar turlarining nisbati;

sof foydani taqsimlash, shuningdek zararlarning o'rnini qoplash tartibi;

zaxira fondini va boshqa fondlarni tashkil etish tartibi;

bank aksiyadorlarining huquqlari va majburiyatlari, shu jumladan ushbu Qonun talablariga muvofiqlikni ta'minlash uchun bank tomonidan so'rab olinadigan axborotni taqdim etish majburiyatlari;

bankning boshqaruv organlari tuzilmasi, ularni tashkil etish tartibi, bank kuzatuv kengashi va boshqaruvi a'zolarining soni, vakolatlari va vazifalari haqidagi ma'lumotlar;

aksiyadorlar (muassislar) o'rtasida manfaatlar to'qnashuvining oldini olish choralari;

bank tomonidan aksiyalarni joylashtirish tartibi va shartlari;

bankni qayta tashkil etish va tugatish tartibi.

Oldingi tahrirga qarang.

Bankning ustavida ushbu moddada belgilangan talablardan tashqari aksiyadorlik jamiyatlari va aksiyadorlarning huquqlarini himoya qilish to'g'risidagi qonunchilikda nazarda tutilgan ma'lumotlar ham bo'lishi kerak.

(14-moddaning uchinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Bankning ustavi, unga kiritiladigan o'zgartirish va qo'shimchalar Markaziy bankda ro'yxatdan o'tkazilishi lozim.

Oldingi tahrirga qarang.

Bankning ichki qoidalari, shuningdek ularga kiritiladigan keyingi o'zgartirish hamda qo'shimchalar banklar va bank faoliyati to'g'risidagi qonunchilikka muvofiq ishlab chiqilishi hamda Markaziy bankka taqdim etilishi kerak.

(14-moddaning beshinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

2-bob. Bank faoliyatiga ruxsat berishga doir eng zarur shartlar

15-modda. Bankni tashkil etish

Banklar aksiyadorlik jamiyati shaklida tashkil etiladi.

Oldingi tahririga qarang.

Bank ta'sis etish yoki qayta tashkil etish yoxud mikromoliya tashkiloti faoliyatini o'zgartirish orqali tashkil etiladi.

(15-moddaning ikkinchi qismi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Banklar O'zbekiston Respublikasida o'z faoliyatini Markaziy bank tomonidan beriladigan, bank faoliyatini amalga oshirish huquqini beruvchi litsenziya (bundan buyon matnda litsenziya deb yuritiladi) asosida amalga oshiradi.

Litsenziya uning amal qilish muddati cheklanmagan holda beriladi.

Litsenziyani yoki unga doir huquqlarni boshqa shaxslarga o'tkazish taqiqlanadi.

Litsenziasiz amalga oshiriladigan bank faoliyati g'ayriqonuniy deb hisoblanadi va javobgarlikka sabab bo'ladi. Bunday faoliyat natijasida olingan daromad O'zbekiston Respublikasi Davlat budjetiga olib qo'yiladi.

Banklarni litsenziyalash tartib-taomili quyidagi ikki bosqichdan iborat:

Markaziy bank tomonidan bankni tashkil etishga doir dastlabki ruxsatnomani berish;

bir vaqtning o'zida litsenziya bergan holda bankni davlat ro'yxatidan o'tkazish.

Oldingi tahririga qarang.

Amalga oshirilishi uchun qonunchilikka muvofiq alohida litsenziyalar yoki ruxsatnomalar olinishi talab etiladigan faoliyat banklar tomonidan tegishli hujjatlar olinganidan keyin amalga oshiriladi.

(15-moddaning sakkizinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

16-modda. Bankni tashkil etishga doir dastlabki ruxsatnomani berish

Oldingi tahririga qarang.

Bankni tashkil etishga doir dastlabki ruxsatnomani olish uchun ariza beruvchi bank tashkil etish to'g'risida qaror qabul qilinganidan keyin uch oydan kechiktirmay Markaziy bankka quyidagilarni ilova qilgan holda ariza taqdim etadi, bundan bankni mikromoliya tashkiloti faoliyatini o'zgartirish orqali tashkil etish mustasno:

(16-modda birinchi qismining birinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Oldingi tahririga qarang.

bank ikki va undan ortiq shaxslar tomonidan tashkil etilganda ta'sis shartnomasini;

(16-modda birinchi qismining ikkinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

ikki nusxadagi bank ustavini;

Oldingi tahririga qarang.

bankni tashkil etish to'g'risidagi qarorni;

(16-modda birinchi qismining to'rtinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Oldingi tahririga qarang.

muassislar (aksiyadorlar) ro'yxatini;

(16-modda birinchi qismining beshinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Oldingi tahrirga qarang.

hal qiluvchi egalikka ega bo'lgan har bir bevosita va bilvosita muassis (egalik qiluvchi), shu jumladan oxirgi benefitsiar mulkdor to'g'risidagi axborotni, shuningdek ushbu Qonunning 24-moddasiga muvofiq baholashni o'tkazish uchun zarur bo'lgan axborotni;

(16-modda birinchi qismining oltinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Oldingi tahrirga qarang.

hal qiluvchi egalikka ega bo'lgan shaxslar mavjud bo'lmagan taqdirda, bankning ustav kapitalida eng ko'p ulushlarga ega bo'lgan, umumiy ulushi kamida ellik foizni tashkil etadigan bevosita va bilvosita muassislar (egalik qiluvchilar), shu jumladan oxirgi benefitsiar mulkdorlar to'g'risidagi axborotni, shu jumladan ushbu Qonunning 24-moddasiga muvofiq baholashni o'tkazish uchun zarur bo'lgan axborotni;

(16-modda birinchi qismining yettinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Oldingi tahrirga qarang.

muassis (aksiyador) bo'lgan yuridik shaxsning auditorlik tashkiloti tomonidan tasdiqlangan oxirgi uch yil uchun moliyaviy hisobotlarini;

(16-modda birinchi qismining sakkizinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Oldingi tahrirga qarang.

bankning ustav kapitalini shakllantirish (to'ldirish) uchun kiritiladigan mablag'larning manbalari to'g'risidagi hujjatlar bilan tasdiqlangan axborotni;

(16-modda birinchi qismining to'qqizinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

bankning kuzatuv kengashi va boshqaruvi a'zolari to'g'risidagi, bu a'zolarining ushbu Qonunning 36-moddasi talablariga muvofiqligini baholash uchun zarur bo'lgan axborotni;

bankning tashkiliy tuzilmasini;

bankning ichki audit xizmati to'g'risidagi nizom loyihasini;

bankning keyingi uch yilga mo'ljallangan biznes-rejasini;

keyinchalik bankning kuzatuv kengashi tomonidan tasdiqlanishi lozim bo'lgan, bankning kredit, investitsiya va emissiya siyosatining loyihalarining, shuningdek tavakkalchiliklarni boshqarish va ichki nazorat siyosati loyihalarining ko'chirma nusxalarini.

Oldingi tahrirga qarang.

(16-modda birinchi qismining o'n beshinchi xatboshisi O'zbekiston Respublikasining 2024-yil 7-fevraldagi O'RQ-905-sonli Qonuniga asosan chiqarilgan — Qonunchilik ma'lumotlari milliy bazasi, 07.02.2024-y., 03/24/905/0106-son)

Bankni tashkil etishga doir dastlabki ruxsatnomani berish to'g'risidagi arizani ko'rib chiqqanlik uchun bazaviy hisoblash miqdorining besh baravari miqdorida yig'im undiriladi.

Ariza beruvchi bankni tashkil etishga doir dastlabki ruxsatnomani berish to'g'risidagi arizada elektron pochta manzilini ko'rsatishga haqli. Elektron pochta manzilining ko'rsatilishi ariza yuzasidan qabul qilingan qaror to'g'risidagi xabarnomani olishga yoki axborot kommunikatsiya tizimi orqali elektron shaklda qo'shimcha axborotni so'rab olinishiga bo'lgan rozilikdir.

Taqdim etilgan hujjatlarda Markaziy bank tomonidan kamchiliklar aniqlangan va (yoki) ushbu moddaning birinchi qismida ko'rsatilgan hujjatlar ariza beruvchi tomonidan to'liq hajmda taqdim etilmagan taqdirda, Markaziy bank ariza beruvchiga bartaraf etilishi lozim bo'lgan kamchiliklar va (yoki) taqdim etilishi zarur bo'lgan hujjatlar ro'yxati ko'rsatilgan holdagi xabarnomani ariza taqdim etilgan kundan e'tiboran o'n besh kun ichida yuboradi.

Bankni tashkil etishga doir dastlabki ruxsatnomani berish to'g'risidagi ariza bankni tashkil etishga doir dastlabki ruxsatnomani olish uchun zarur bo'lgan barcha hujjatlar taqdim etilgan kundan e'tiboran uch oy ichida Markaziy bank tomonidan ko'rib chiqilishi kerak. Mazkur muddat ushbu moddaning **oltinchi qismida** ko'rsatilgan hollarda to'rt oygacha uzaytirilishi mumkin.

Agar ariza beruvchi tomonidan taqdim etilgan, ushbu moddaning **birinchi qismida** ko'rsatilgan hujjatlar va axborot bankni tashkil etishga doir dastlabki ruxsatnomani berish to'g'risida qaror qabul qilish uchun yetarli bo'lmasa, Markaziy bank ariza beruvchidan qo'shimcha hujjatlar va axborot so'rashga haqlidir.

Ariza beruvchi Markaziy bank so'ragan hujjatlar va axborotni so'rov olingan kundan e'tiboran o'ttiz kalendar kundan oshmagan muddatda ushbu moddaning **oltinchi qismiga** muvofiq taqdim etishi kerak, ushbu muddat mobaynida bankni tashkil etishga doir dastlabki ruxsatnomani berish to'g'risidagi ariza ko'rib chiqiladigan uch oylik davr to'xtatib turiladi.

Markaziy bank ariza beruvchini qabul qilingan qaror to'g'risida tegishli qaror qabul qilingan sanadan e'tiboran uch ish kuni ichida yozma shaklda, shu jumladan axborot-kommunikatsiya tizimi orqali elektron shaklda xabardor qiladi.

Bankni tashkil etishga doir dastlabki ruxsatnoma olingan kundan e'tiboran olti oydan oshmagan muddat ichida yuridik kuchini saqlab turadi.

Bankni tashkil etishga doir dastlabki ruxsatnoma quyidagi hollarda amal qilish muddati tugashidan oldin bekor qilinadi:

dastlabki ruxsatnoma soxta hujjatlardan foydalangan holda olinganligi fakti aniqlanganda;

Oldingi tahrirga qarang.

ilgari baholashdan o'tgan va ushbu Qonunning **24-moddasi** talablariga javob bergan muassislar, bevosita yoki bilvosita egalik qiluvchilar, shu jumladan oxirgi benefitsiar mulkdorlar endilikda ushbu modda talablariga muvofiq bo'lmaganda;

(16-modda o'ninchi qismining uchinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

ilgari baholashdan o'tgan va ushbu Qonunning **36-moddasi** talablariga javob bergan bank kuzatuv kengashi va (yoki) boshqaruvi a'zolari endilikda ushbu modda talablariga muvofiq bo'lmaganda, shuningdek bank kuzatuv kengashi va (yoki) boshqaruvining yangi tayinlangan a'zolari to'g'risida axborot taqdim etilmaganda;

taqdim etilgan biznes-rejaga tarkibiy o'zgartishlar kiritilganda;

bankni xavfsiz va barqaror boshqarishni ta'minlab bo'lmashligini ko'rsatuvchi faktlar aniqlanganda.

Oldingi tahrirga qarang.

17-modda. Chet ellik muassislarga (aksiyadorlarga) nisbatan ular tomonidan bankni tashkil etish yoki bankning ustav kapitalida ishtirok etish chog'ida qo'yiladigan qo'shimcha talablar

(17-moddaning nomi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Bankni tashkil etishda yoki bankning ustav kapitalida chet el banki ishtirok etganda ushbu Qonunning **16-moddasida** ko'rsatilgan hujjatlardan tashqari quyidagi hujjatlar qo'shimcha ravishda taqdim etiladi:

chet el banki vakolatli organining bankni tashkil etish yoki bankning ustav kapitalida ishtirok etish to'g'risidagi qarori;

chet el bankining ustavi;

chet el banki bankni nazorat qilish organining mazkur chet el banki uning konsolidatsiyalashgan nazorati ostida turishi, pul mablag'larini depozitlarga qabul qilish huquqiga ega ekanligi va unga bankni nazorat qilish organining bankni tashkil etish yoki bankning ustav kapitalida ishtirok etish uchun ruxsatnomasi berilganligi to'g'risidagi yozma tasdiqnomasi yoxud shunday ruxsatnoma talab etilmasligi to'g'risidagi tasdiqnomasi;

chet el banki kapitalining va kredit reytingining Markaziy bank tomonidan belgilangan talablarga muvofiqligini tasdiqlovchi hujjat.

Markaziy bank yuqori kapital va kredit reytingi ko'rsatkichlariga ega bo'lgan xalqaro moliya institutlari, chet el banklari hamda boshqa kredit tashkilotlari tomonidan bank tashkil etayotganda yoki bankning ustav kapitalida ishtirok etayotganda dastlabki ruxsatnomani olishning alohida tartibini belgilashga haqli.

Norezident bo'lgan jismoniy shaxslarning va xalqaro moliya institutlari, chet el banklari va boshqa kredit tashkilotlari bo'lmagan yuridik shaxslarning jami ulushi bank ustav kapitalining ellik foizidan oshmasligi kerak.

Oldingi tahrirga qarang.

Markaziy bank xalqaro moliya institutlari, chet el banklari va boshqa kredit tashkilotlari bo'lmagan, bank muassislari (aksiyadorlari) bo'lgan norezidentlarning kapitaliga hamda kredit reytingiga nisbatan, shuningdek norezidentlar joylashgan davlatning reytingiga nisbatan eng zarur talablarni belgilashga haqli.

(17-moddaning to'rtinchi qismi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Oldingi tahrirga qarang.

Imtiyozli soliq rejimini taqdim etuvchi va (yoki) oxirgi benefitsiar mulkdorning shaxsini oshkor qilish hamda moliyaviy operatsiyalarni o'tkazish chog'ida axborot taqdim etish nazarda tutilmaydigan davlatda yoki hududda ro'yxatga olingan yuridik shaxslar va shunday davlatda yoki hududda yashaydigan jismoniy shaxslar bankning muassislari va aksiyadorlari bo'lishi mumkin emas (bundan chet el fond bozorlarida bank aksiyalarini sotib olgan yuridik va jismoniy shaxslar mustasno).

(17-moddaning beshinchi qismi O'zbekiston Respublikasining 2023-yil 19-apreldagi O'RQ-831-sonli Qonuni tahririda — Qonunchilik ma'lumotlari milliy bazasi, 20.04.2023-y., 03/23/831/0219-son)

Bank tashkil etishga doir dastlabki ruxsatnomani berish to'g'risidagi arizani ko'rib chiqishda Markaziy bank:

Oldingi tahrirga qarang.

Markaziy bank bilan chet el banki bo'lgan muassisning (aksiyadorning) bankni nazorat qilish organi o'rtasida axborot ayirboshlash to'g'risidagi kelishuv mavjudligini;

(17-modda oltinchi qismining ikkinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Oldingi tahrirga qarang.

norezident joylashgan mamlakat vakolatli organlarining axborotini va fikrlarini inobatga oladi. Markaziy bank mazkur holatlarni bankning ustav kapitalidagi ushbu Qonun 22-moddasi birinchi qismining to'rtinchi xatboshisida nazarda tutilgan miqdordagi ulushni olishga doir dastlabki ruxsatnomani berish to'g'risidagi arizani ko'rib chiqish chog'ida ham inobatga oladi.

(17-modda oltinchi qismining uchinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Oldingi tahrirga qarang.

Ushbu Qonunning 16-moddasida va ushbu moddaning birinchi qismida ko'rsatilgan hujjatlar muassis (aksiyador) bo'lgan bank ro'yxatga olingan yerda joylashgan O'zbekiston Respublikasining konsullik muassasasi yoki boshqa konsullik muassasalari tomonidan tasdiqlanadi, bundan ushbu Qonun 16-moddasi birinchi qismining uchinchi, beshinchi, sakkizinchi, to'qqizinchi, o'n birinchi — o'n to'rtinchi xatboshilarida nazarda tutilgan hujjatlar mustasno.

(17-moddaning yettinchi qismi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

18-modda. Litsenziyalashdan oldin boshqa organlar bilan maslahatlashish

Oldingi tahrirga qarang.

Markaziy bank litsenziyalashdan oldingi tartib-taomillar doirasida vazirliklar, idoralar hamda boshqa davlat va xo‘jalik boshqaruvi organlari bilan maslahatlashishga haqlidir.

(18-moddaning birinchi qismi O‘zbekiston Respublikasining 2023-yil 28-noyabrdagi O‘RQ-880-sonli Qonuni tahririda — Qonunchilik ma’lumotlari milliy bazasi, 29.11.2023-y., 03/23/880/0905-son)

Oldingi tahrirga qarang.

Vazirliklar, idoralar hamda boshqa davlat va xo‘jalik boshqaruvi organlari Markaziy bank tomonidan so‘ralgan, tegishli qarorni qabul qilish uchun zarur bo‘lgan axborotni taqdim etishi kerak.

(18-moddaning ikkinchi qismi O‘zbekiston Respublikasining 2023-yil 28-noyabrdagi O‘RQ-880-sonli Qonuni tahririda — Qonunchilik ma’lumotlari milliy bazasi, 29.11.2023-y., 03/23/880/0905-son)

Markaziy bank chet davlatlarning vakolatli organlariga zarur axborotni taqdim etish to‘g‘risida so‘rovnomalar yuborishga haqli.

19-modda. Bankni tashkil etishga doir dastlabki ruxsatnomani berishni rad etish

Bankni tashkil etishga doir dastlabki ruxsatnomani berishni rad etish uchun quyidagilar asos bo‘ladi:

Oldingi tahrirga qarang.

ushbu Qonun 16 va 17-moddalarida ko‘rsatilgan taqdim etilgan hujjatlarning banklar va bank faoliyati to‘g‘risidagi qonunchilik talablariga muvofiq emasligi;

(19-modda birinchi qismining ikkinchi xatboshisi O‘zbekiston Respublikasining 2021-yil 21-apreldagi O‘RQ-683-sonli Qonuni tahririda — Qonunchilik ma’lumotlari milliy bazasi, 21.04.2021-y., 03/21/683/0375-son)

Oldingi tahrirga qarang.

baholanishi ushbu Qonunning 24-moddasiga muvofiq amalga oshirilgan bevosita va bilvosita muassislarning (egalik qiluvchilarning), shu jumladan oxirgi benefitsiar mulkdorlarning mazkur modda talablariga muvofiq emasligi;

(19-modda birinchi qismining uchinchi xatboshisi O‘zbekiston Respublikasining 2025-yil 11-fevraldagi O‘RQ-1026-sonli Qonuni tahririda — Qonunchilik ma’lumotlari milliy bazasi, 12.02.2025-y., 03/25/1026/0131-son)

bankning biznes-rejada ko‘rsatilgan maqsadlarga erishishga qodir emasligi;

Oldingi tahrirga qarang.

tashkil etiladigan bank bilan yaqin aloqalarga ega bo‘lgan bir yoki bir necha shaxsning faoliyatini tartibga soluvchi boshqa mamlakat qonunlarida yoki normativ hujjatlarida ushbu shaxslarga nisbatan boshqa mamlakat vakolatli organlarining talablari mavjudligi yoxud ular tomonidan qo‘llanilgan, Markaziy bankning nazorat qilish vazifasini amalga oshirishiga to‘sqinlik qiluvchi taqiqlar hamda cheklovlar qo‘llanilganligi yoki O‘zbekiston Respublikasining banklar va bank faoliyati to‘g‘risidagi qonunchiligiga rioya etish borasida boshqa moneliklarning mavjudligi;

(19-modda birinchi qismining beshinchi xatboshisi O‘zbekiston Respublikasining 2021-yil 21-apreldagi O‘RQ-683-sonli Qonuni tahririda — Qonunchilik ma’lumotlari milliy bazasi, 21.04.2021-y., 03/21/683/0375-son)

ushbu Qonun 16-moddasining oltinchi qismiga muvofiq Markaziy bank tomonidan so‘ralgan qo‘shimcha hujjatlarning va axborotning taqdim etilmaganligi.

Yaqin aloqalar deganda ikki yoki bir necha shaxs quyidagilar vositasida o‘zaro bog‘liq bo‘lgan holat tushuniladi:

yuridik shaxs ovoz berish huquqlarining yoki ustav fondining (ustav kapitalining) kamida yigirma foiziga bevosita egalik qilishni yoki nazoratni qo‘lga kiritish;

nazorat qilish;

ikki shaxs yoki barcha shaxslar o‘rtasida yoki shu shaxslar va uchinchi shaxs o‘rtasida o‘rnatilgan doimiy nazoratning mavjudligi.

Nazorat deganda shaxslar o‘rtasidagi quyidagi mezonlardan biriga mos keluvchi o‘zaro aloqa tushuniladi:

shaxs tomonidan boshqa yuridik shaxsning ustav fondida (ustav kapitalida) ustunlik qiladigan ulushlarga egalik qilish;

yuridik shaxsning ishtirokchisi (aksiyadori) bo'lgan shaxsning shu yuridik shaxs boshqaruv organlarining ko'pchilik a'zolarini tayinlash yoki almashtirish huquqi;

shaxsning yuridik shaxs faoliyatiga, u bilan tuzilgan shartnomaga va (yoki) uning ustavi qoidalariga muvofiq ta'sir ko'rsatish imkoniyati;

yuridik shaxsning ishtirokchisi (aksiyadori) bo'lgan shaxsning shu yuridik shaxs boshqaruv organlarining ovoz berish huquqini amalga oshirishi natijasida o'zi tayinlagan a'zolariga ta'sir ko'rsatish imkoniyati. Ushbu mezon, agar nazorat ushbu qismning **ikkinchi — to'rtinchi xatboshilarida** ko'rsatilgan mezonlardan biriga muvofiq bo'lsa, qo'llanilmaydi;

yuridik shaxsning ishtirokchisi (aksiyadori) bo'lgan shaxsning o'zining boshqa ishtirokchilari (aksiyadorlari) yoki a'zolari bilan kelishuvga binoan mazkur yuridik shaxsning ustav fondida (ustav kapitalida) ustunlik qiladigan ulushlarni boshqarish imkoniyati.

Markaziy bankning asoslantirilgan mulohazasi bankni tashkil etishga doir dastlabki ruxsatnomani berishni rad etish uchun asos bo'ladi.

Dastlabki ruxsatnomani berishni rad etish to'g'risidagi xabarnoma ariza beruvchiga ushbu Qonun 16-moddasining **sakkizinchi qismida** nazarda tutilgan muddatlarda va shakllarda, rad etish sabablari ko'rsatilgan holda yuboriladi.

Rad etish to'g'risidagi xabarnomada ko'rsatilgan kamchiliklar bartaraf qilinganligi inobatga olingan holda taqdim etilgan ariza va hujjatlar yangidan berilgan deb hisoblanadi.

20-modda. Bankni davlat ro'yxatiga olish va litsenziya berish

Bankni davlat ro'yxatiga olish va litsenziya olish uchun ariza beruvchi bankni tashkil etishga doir dastlabki ruxsatnoma olinganidan keyin olti oydan kechiktirmay Markaziy bankka quyidagilarni taqdim etishi kerak:

bankni davlat ro'yxatiga olish va litsenziya berish to'g'risidagi ariza;

Oldingi tahrirga qarang.

ushbu Qonun bilan belgilangan eng kam miqdordan kam bo'lmagan summada bankning ustav kapitali shakllantirilganligini tasdiqlovchi hujjat, shuningdek muassislarning (aksiyadorlarning) ro'yxati;

(20-modda birinchi qismining uchinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

bankning muhim ahamiyatga ega xodimlari to'g'risida ularning ushbu Qonunning **36-moddasi** talablariga muvofiqqligini baholashdan o'tkazish uchun zarur bo'lgan axborot;

tashkil etilayotgan bank joylashgan yerdagi Markaziy bank hududiy bosh boshqarmasining bank binolari, ularning muhofaza qilinishi ta'minlanganligi, uskunalar, ishlarni tashkil etish texnika vositalari bilan jihozlanganligining va dasturiy ta'minotining Markaziy bank talablariga muvofiqqligi to'g'risidagi xulosasi;

ushbu Qonunning **16 va 17-moddalarida** sanab o'tilgan barcha hujjatlarning elektron shakldagi ko'chirma nusxalari.

Basharti bankning faoliyati xavfsiz tarzda amalga oshirilishi ta'minlansa hamda omonatchilar va kreditorlarning manfaatlari himoya qilinishini, shuningdek bank tizimi lozim darajada ishlashini kafolatlovchi korporativ boshqaruv talablariga rioya etilsa, Markaziy bank bankni davlat ro'yxatiga olish hamda litsenziya berish to'g'risida qaror qabul qiladi.

Bankni davlat ro'yxatiga olish va litsenziya berish haqidagi qaror ariza barcha zarur hujjatlar bilan olingan kundan e'tiboran bir oydan oshmagan muddatda qabul qilinadi.

Markaziy bank tegishli qaror qabul qilingan sanadan e'tiboran uch ish kuni ichida ariza beruvchini qabul qilingan qaror haqida yozma shaklda, shu jumladan axborot-kommunikatsiya tizimi orqali elektron shaklda xabardor qiladi.

Oldingi tahrirga qarang.

Litsenziya berilganligi uchun qonunda belgilangan miqdorda davlat boji undiriladi.

(20-moddaning beshinchi qismi O'zbekiston Respublikasining 2020-yil 6-yanvardagi O'RQ-600-sonli Qonuni tahririda — Qonun hujjatlari ma'lumotlari milliy bazasi, 07.01.2020-y., 03/20/600/0023-son)

Bankning davlat ro'yxatiga olinganligi va unga litsenziya berilganligi to'g'risidagi axborot Markaziy bankning rasmiy veb-saytida e'lon qilinadi.

Litsenziyaning qalbaki hujjatlardan foydalangan holda olinganligi fakti aniqlangan taqdirda litsenziya Markaziy bank tomonidan chaqirib olinadi.

21-modda. Bankni davlat ro'yxatiga olishni va litsenziya berishni rad etish

Bankni davlat ro'yxatiga olishni va litsenziya berishni rad etish uchun quyidagilar asos bo'ladi:

Bankning shakllantirilgan ustav kapitali miqdorining bankni davlat ro'yxatiga olish va litsenziya berish to'g'risidagi arizani topshirish paytida ushbu Qonun talablariga muvofiq emasligi;

Oldingi tahrirga qarang.

ilgari baholashdan o'tgan va ushbu Qonunning 24-moddasi talablariga javob bergan muassislarning bevosita va bilvosita egalik qiluvchilarning, shu jumladan oxirgi benefitsiar mulkdorlarning endilikda ushbu modda talablariga muvofiq emasligi;

(21-modda birinchi qismining uchinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

muhim ahamiyatga ega xodimlarning Markaziy bankning malaka talablariga muvofiq emasligi;

bankning binolari, ularning muhofaza qilinishi ta'minlanganligi, uskunalar va ishlarni tashkil etish texnika vositalari bilan jihozlanganligining va dasturiy ta'minotining Markaziy bank talablariga muvofiq emasligi.

Bankni davlat ro'yxatiga olish va litsenziya berish rad etilganligi to'g'risidagi xabarnoma ariza beruvchiga ushbu Qonun 20-moddasining to'rtinchi qismida nazarda tutilgan muddatda va shakllarda, rad etish sabablari hamda ariza beruvchi ko'rsatilgan kamchiliklarni bartaraf etib, takroran ko'rib chiqish uchun hujjatlarni taqdim etishi mumkin bo'lgan muddat ko'rsatilgan holda yuboriladi.

Bankni ro'yxatga olish va litsenziya berish rad etilganligi to'g'risidagi xabarnomada ko'rsatilgan muddat kamchiliklarni bartaraf etish uchun zarur bo'lgan vaqtga mutanosib bo'lishi kerak hamda ikki oydan kam bo'lishi mumkin emas.

Ariza beruvchi tomonidan bankni davlat ro'yxatiga olishni va litsenziya berishni rad etish uchun asos bo'lgan sabablar bartaraf etilgan taqdirda, hujjatlarni qayta ko'rib chiqish ariza barcha zarur hujjatlar bilan olingan kundan e'tiboran bir oydan oshmagan muddatda amalga oshiriladi.

Bankni davlat ro'yxatiga olish va litsenziya berish to'g'risidagi arizani qayta ko'rib chiqish chog'ida bankni davlat ro'yxatiga olishni va litsenziya berishni rad etish haqidagi xabarnomada ilgari ko'rsatilmagan yangi asoslar bo'yicha rad etishga yo'l qo'yilmaydi.

Bankni davlat ro'yxatiga olishni va unga litsenziya berishni rad etish to'g'risidagi xabarnomada ko'rsatilgan muddat o'tganidan keyin berilgan bankni davlat ro'yxatiga olish va litsenziya berish to'g'risidagi ariza yangidan berilgan deb hisoblanadi.

22-modda. Bank aksiyalariga egalik qilishga doir ruxsatnoma va cheklov

Jismoniy va yuridik shaxslar yoki birgalikda harakat qiluvchi shaxslar, shu jumladan norezidentlar bir yoki bir necha bitim natijasida bankning ustav kapitalidagi:

besh va undan ko'proq foizni, lekin ko'pi bilan yigirma foizni;

yigirma va undan ko'proq foizni, lekin ko'pi bilan ellik foizni;

ellik va undan ko'proq foizni tashkil etadigan ulushni bevosita yoki bilvosita olishdan oldin Markaziy bankning dastlabki ruxsatnomasini olishi shart.

Ushbu moddaning birinchi qismida belgilangan bank ustav kapitalidagi ulushlar Markaziy bankning dastlabki ruxsatnomasini olgan shaxslar tomonidan o'zgartirilgan taqdirda, ushbu Qonunning 26-moddasida ko'rsatilgan tartibda xabardor qilish yo'li bilan amalga oshiriladi.

Quyidagilar birgalikda harakat qiluvchi shaxslar hisoblanadi:

1) bank aksiyalarini muvofiqlashtirilgan (kelishilgan) tarzda sotib olishni yoki shaxslarning bank aksiyalarini birgalikda sotib olish niyatida ekanligini ko'rsatuvchi shartlar asosida bank aksiyalarini sotib olgan shaxslar;

2) jalb etilgan shaxslar:

a) boshqa shaxs ustidan nazoratni amalga oshiruvchi yoki boshqa shaxsning nazorati ostidagi yoxud uchinchi shaxsning birgalikdagi nazorati ostidagi shaxslar;

b) ovoz berish huquqini olish uchun yoki ovoz berish huquqini birgalikda amalga oshirish uchun bitimlarda bevosita yoki bilvosita ishtirok etuvchi shaxslar, agar bitimning predmeti bo'lgan ulushlar (aksiyalar) ularga nazoratni ta'minlasa;

v) yuridik shaxsga nisbatan rahbarlik vakolatiga yoki nazorat qilish vakolatiga ega bo'lgan jismoniy shaxslar;

g) yuridik shaxs boshqaruv organlari a'zolarining ko'pchiligini tayinlash vakolatiga ega bo'lgan shaxslar;

d) yaqin qarindoshlar (qarindoshlik yoki qayin-bo'yinchilik munosabatidagi shaxslar, ya'ni ota-ona, tug'ishgan va o'gay aka-ukalar, opa-singillar, er-xotin, farzandlar, shu jumladan farzandlikka olinganlar, bobolar, buvilar, nevaralar, er-xotinning ota-onasi, tug'ishgan yoki o'gay aka-ukalari, opa-singillari, shuningdek ularning nazorati ostidagi yuridik shaxslar);

3) nazoratni amalga oshiruvchi yuridik shaxs va uning nazorati ostidagi yuridik shaxslar, shuningdek bitta nazorat qiluvchi yuridik shaxsning nazorati ostidagi yuridik shaxslar o'zaro;

4) yuridik shaxs o'z boshqaruv organi a'zolari va jalb etilgan shaxslari bilan birga, shuningdek ushbu shaxslar o'zaro;

5) o'zining moliya-xo'jalik faoliyatida ayni bir shaxs tomonidan taqdim etilgan yoki jalb etilgan shaxslar hisoblanuvchi turli shaxslardan kelib tushayotgan moliyaviy resurslardan foydalanuvchi shaxslar;

6) o'z iqtisodiy faoliyatidan olingan nafni ayni bir shaxsga yoki jalb etilgan shaxslar bo'lgan turli shaxslarga o'tkazuvchi shaxslar;

7) asosan ishtirokchilarning (aksiyadorlarning) yoki boshqaruv organlarining bir xil tarkibiga ega bo'lgan yuridik shaxslar;

8) bitta emitent yoki jalb etilgan shaxslar tomonidan chiqarilgan moliyaviy vositalarni sotib olish va (yoki) sotish orqali aynan o'xshash investitsiya siyosatini qabul qilgan yoki amalga oshirayotgan shaxslar;

9) bank tomonidan chiqarilgan qimmatli qog'ozlar beradigan huquqlarni o'xshash holda amalga oshirish orqali bankka nisbatan birgalikdagi uzoq muddatli siyosatni olib boruvchi shaxslar;

10) jalb etilgan shaxs (jalb etilgan shaxslar) bo'lgan ayni bir shaxsni (ayni o'sha shaxslarni) moliya-xo'jalik faoliyatini amalga oshirish, manfaatlarni ifodalash yoki o'z egaligida bo'lgan ustav fondidagi (ustav kapitalidagi) ulushlar yoki aksiyalar beradigan ovoz berish huquqlarini amalga oshirish uchun vakolatli vakil (vakolatli vakillar) sifatida tayinlagan yoki tayinlaydigan shaxslar;

11) bank bilan bog'liq bo'lgan operatsiyalarni o'tkazish maqsadida har qanday tashkiliy-huquqiy shaklga birlashgan shaxslar;

12) bir vaqtning o'zida bir yoki bir necha yuridik shaxsning ustav fondida (ustav kapitalida) aksiyalarga yoki ulushlarga ega bo'lgan yoki egalik qiluvchi, ularning ustidan nazoratni amalga oshiruvchi va ularga nisbatan birgalikda siyosatni amalga oshiruvchi shaxslar;

13) birgalikda moliya-xo'jalik faoliyatini amalga oshirgan yoki amalga oshirayotgan shaxslar;

14) Markaziy bank tomonidan asosli mulohaza asosida belgilangan boshqa shaxslar.

Banklar boshqa bankning aksiyalarini bevosita yoki bilvosita olishdan oldin Markaziy bankning dastlabki ruxsatnomasini olishi shart. Banklar boshqa bankning ustav kapitalidagi ulushini ko'paytirish uchun Markaziy bankning takroriy dastlabki ruxsatnomasini olishi shart.

Oldingi tahrirga qarang.

(22-moddaning beshinchi qismi O'zbekiston Respublikasining 2023-yil 19-apreldagi O'RQ-831-sonli Qonuniga asosan chiqarilgan — Qonunchilik ma'lumotlari milliy bazasi, 20.04.2023-y., 03/23/831/0219-son)

Agar bankning aksiyalarini olishga doir dastlabki ruxsatnomani olish uchun monopoliyaga qarshi organning oldindan roziligini olish talab etilsa, bank aksiyalarini olishga doir dastlabki ruxsatnomani olish uchun berilgan ariza Markaziy bank tomonidan monopoliyaga qarshi organning qarorini hisobga olgan holda ko'rib chiqiladi.

Ushbu moddaning **birinchi** va **to'rtinchi qismlarida** ko'rsatilgan bank aksiyalarini olishga doir dastlabki ruxsatnomasiz tuzilgan bank aksiyalarini olishga oid bitimlar haqiqiy emas deb hisoblanadi.

Bank aksiyalari ushbu moddaning **birinchi** va **to'rtinchi qismlarida** belgilangan talablar buzilgan holda olingan taqdirda, aksiyalarning egasi bunday bitim tuzilgan kundan e'tiboran aksiyadorlarning umumiy yig'ilishida ovoz berishga, aksiyadorlarning navbatdan tashqari umumiy yig'ilishini chaqirishni va o'tkazishni talab qilishga, kun tartibiga masalalar kiritishga, bank kuzatuv kengashi va boshqaruvi a'zolariga nomzodlar ko'rsatishga, shuningdek bank foydasining bir qismini dividendlar tarzida olishga haqli emas.

Shaxs o'ziga bog'liq bo'lmagan holatlarda bankning aksiyalarini ushbu moddaning **birinchi qismida** ko'rsatilgan hajmda olganda Markaziy bank ruxsatnomasini olish talab qilinadi. Shaxs o'ziga bog'liq bo'lmagan holatlarda bankning aksiyalarini olgan kundan e'tiboran Markaziy bank tomonidan tegishli qaror qabul qilinadigan kunga qadar aksiyalar egasining huquqlari to'xtatib turiladi.

Aksiyador o'ziga bog'liq bo'lmagan holatlarda bank aksiyalarini olgan kundan e'tiboran oltmish kun ichida Markaziy bankning ruxsatnomasini olish uchun ariza taqdim etishi kerak. Aksiyador tomonidan ariza taqdim etilmagan taqdirda, o'ziga bog'liq bo'lmagan holatlarda olingan bank aksiyalari olingan kundan e'tiboran uch oy ichida boshqa shaxsga berilishi lozim.

23-modda. Bank aksiyalarini olishga doir dastlabki ruxsatnomani berish

Potensial oluvchi bank aksiyalarini olishga doir dastlabki ruxsatnomani olish uchun Markaziy bank tomonidan belgilangan hujjatlar ilova qilingan holdagi arizani Markaziy bankka taqdim etadi. Markaziy bank ariza olingan kundan e'tiboran uch ish kuni ichida potensial oluvchiga ariza olinganligi to'g'risida tasdiqnoma yuboradi.

Birgalikda harakat qilayotgan, mo'ljallanilayotgan sotib olish munosabati bilan bank aksiyalarini bevosita yoki bilvosita, shu jumladan oxirgi benefitsiar mulkdor sifatida olishni niyat qilgan shaxs yoki shaxslar guruhi potensial oluvchidir.

Markaziy bank potensial sotib oluvchini ariza olinganligi to'g'risida tasdiqnoma yuborilgan kundan e'tiboran ikki oy ichida ushbu Qonunning **24-moddasiga** muvofiq baholashni amalga oshiradi.

Potensial oluvchi hujjatlarni to'liq hajmda taqdim etmagan taqdirda, baholash davri Markaziy bank tomonidan barcha tegishli hujjatlar olingan kundan e'tiboran boshlanadi.

Potensial sotib oluvchining ushbu Qonunning **24-moddasida** ko'rsatilgan mezonlardan birontasiga muvofiq emasligini tasdiqlovchi hujjatlar va (yoki) axborot mavjud bo'lgan taqdirda, Markaziy bank bankning aksiyalarini olishga doir dastlabki ruxsatnomani berishni baholashni o'tkazmasdan rad etishga haqli.

Markaziy bank baholash o'tkazilayotgan davrda potensial oluvchiga baholashni tamomlash uchun zarur bo'lgan qo'shimcha hujjatlarni va axborotni taqdim etishi to'g'risida so'rovnoma yuborishga haqli.

Potensial oluvchi Markaziy bankning so'rovnomasiga binoan qo'shimcha hujjatlar va axborotni so'rovnoma olingan kundan e'tiboran yigirma ish kunidan oshmagan muddatda taqdim etishi kerak, shu vaqt mobaynida baholash davri to'xtatib turiladi. Potensial oluvchi chet elda joylashgan yoki unga nisbatan boshqa davlatning qonunlari tatbiq etilgan taqdirda, Markaziy bank qo'shimcha axborot taqdim etish davrini o'ttiz ish kunigacha uzaytirishga haqli. Taqdim etilgan axborotni aniqlashtirish maqsadida Markaziy bank tomonidan potensial oluvchiga yuboriladigan keyingi so'rovnomalar baholash davrining to'xtatib turilishiga olib kelmasligi kerak.

Potensial oluvchi tomonidan ushbu moddaning **yettinchi qismida** ko'rsatilgan muddatlarga rioya etilmagan taqdirda, Markaziy bank bankning aksiyalarini olishga doir dastlabki ruxsatnomani berishni rad etishga haqlidir.

Markaziy bank potensial oluvchining so'rovnomasi asosida bankning aksiyalarini olishga doir dastlabki ruxsatnomani olish uchun berilgan arizani ko'rib chiqish natijalari yuzasidan qabul qilingan asoslangan qarorni o'z rasmiy veb-saytida e'lon qiladi. Markaziy bank mazkur axborotni potensial oluvchining so'rovnomasi bo'lmasa ham e'lon qilishga haqli.

Bank aksiyalarini olishga doir dastlabki ruxsatnoma olingan kundan e'tiboran olti oy mobaynida yuridik kuchini saqlab qoladi.

Oldingi tahrirga qarang.

Bank aksiyalarini olishga doir dastlabki ruxsatnomani bekor qilish banklar va bank faoliyati to'g'risidagi qonunchilikka muvofiq amalga oshiriladi.

(23-moddaning o'n birinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

24-modda. Potensial oluvchini baholash

Bank aksiyalarini olishga doir dastlabki ruxsatnomani olish uchun berilgan arizani ko'rib chiqish chog'ida Markaziy bank:

potensial oluvchining ishchanlik obro'sini;

mo'ljallanayotgan olish amalga oshirilganidan keyin tayinlanishi nazarda tutilayotgan bankning kuzatuv kengashi va boshqaruvi a'zolarining, shuningdek muhim ahamiyatga ega xodimlarining ishchanlik obro'si, bilimi, malakasi va tajribasini;

potensial oluvchining moliyaviy salohiyatini, xususan aksiyalarini olish mo'ljallanilayotgan bank faoliyatining ko'lami va ixtisoslashuvi jihatidan salohiyatini;

Oldingi tahrirga qarang.

mo'ljallanilayotgan olish amalga oshirilganidan keyin bankning banklar va bank faoliyati to'g'risidagi qonunchilikda belgilangan prudensial talablarni bajara olish imkoniyatini;

(24-modda birinchi qismining beshinchi xatboshisi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

mo'ljallanilayotgan olish borasida jinoiy faoliyatdan olingan daromadlarni legallashtirishga, terrorizmni moliyalashtirishga va ommaviy qirg'in qurolining tarqatilishini moliyalashtirishga doir amalga oshirilgan yoki amalga oshirilayotgan urinishlar mavjudligi haqidagi shubhalar, shuningdek mo'ljallanilayotgan olish amalga oshirilganidan keyin shunday tavakkalchilikning ortishi to'g'risidagi taxmin mavjud emasligini;

potensial oluvchi faoliyatining bank faoliyati bilan uyg'unlashuvi ehtimolini va buning bank faoliyatining rivojlanishiga ta'sirini;

potensial oluvchi korporativ boshqaruvi tashkiliy tuzilmasining va unga aloqador bo'lgan shaxslarning bankni tartibga solishga hamda uning ustidan nazorat qilishga doir ta'sirini baholaydi.

Boshqa shaxsga aloqador shaxslar quyidagilardan iborat:

yuridik shaxs boshqaruvi organlarining a'zolari, shuningdek bankning muhim ahamiyatga ega xodimlari;

bevosita yoki bilvosita, yakka tartibda yoki shaxslar guruhi tarkibida birgalikda faoliyat ko'rsatuvchi, bankda hal qiluvchi egalikka ega bo'lgan jismoniy va (yoki) yuridik shaxslar, shu jumladan oxirgi benefitsiar mulkdorlar. Agar mazkur jismoniy shaxslarning yaqin qarindoshlari bankning ustav kapitalidagi ulushlarga egalik qilsa yoki egalikni nazorat qilsa, uning miqdoridan qat'i nazar, ushbu ulush mazkur shaxsning egaligida va nazorati ostida turgan deb hisoblanadi;

boshqa shaxs ustidan nazoratni amalga oshirayotgan yoki boshqa shaxsning nazorati ostidagi yoxud uchinchi shaxsning birgalikdagi nazorati ostidagi shaxslar;

bank ustidan nazoratni amalga oshirayotgan shaxslar o'zida hal qiluvchi egalikka ega bo'lgan yuridik shaxslar;

ushbu qismning **ikkinchi — beshinchi xatboshilarida** ko'rsatilgan shaxslarga aloqador shaxslar, shu jumladan jismoniy shaxsning yaqin qarindoshlari, shuningdek jismoniy shaxslar va (yoki) ularning yaqin qarindoshlari o'zida nazoratni amalga oshirayotgan yoki ustav fondlarida (ustav kapitallarida) ulushlarga egalik qilayotgan yoki boshqaruv organining a'zolari bo'lgan yuridik shaxslar;

Oldingi tahrirga qarang.

ushbu qismning **ikkinchi — oltinchi xatboshilarida** ko'rsatilgan shaxslarning manfaatlarini ko'zlab bank bilan qaysi shaxslar orqali bitim amalga oshiriladigan bo'lsa, o'sha shaxslar va mazkur shaxslar o'rtasida qonunchilikda belgilangan mehnatga oid fuqaroviy yoki boshqa munosabatlar mavjudligi tufayli mazkur bitimda ushbu qismning **ikkinchi — oltinchi xatboshilarida** ko'rsatilgan shaxslarning ta'siri ostida deb hisoblanadigan shaxslar;

(24-modda ikkinchi qismining yettinchi xatboshisi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

asoslantirilgan mulohaza asosida Markaziy bank tomonidan belgilangan boshqa shaxslar.

Markaziy bank potensial oluvchiga dastlabki ruxsatnomani quyidagi hollarda beradi:

potensial oluvchi ushbu moddaning **birinchi qismida** ko'rsatilgan mezonlarga to'liq mos kelsa;

potensial oluvchi mo'ljallanilayotgan olishning oxirgi benefitsiar mulkdori emasligi xususida shubha mavjud bo'lmasa;

aksiyadorlar bo'lgan yuridik shaxslarning haddan tashqari (potensial oluvchidan oxirgi benefitsiar mulkdorgacha uchta pog'onadan ko'p) darajalarga tabaqalashtirilishi mavjud bo'lmasa;

hujjatlar to'liq hajmda topshirilgan bo'lsa;

potensial oluvchi taqdim etgan hujjatlarda va axborotda noto'g'ri yoki buzib ko'rsatilgan ma'lumotlar mavjud bo'lmasa.

Markaziy bank ushbu moddada nazarda tutilgan baholashni faqat bank aksiyalariga bevosita egalik qiluvchi va oxirgi benefitsiar mulkdor bo'lgan shaxsga nisbatan o'tkazish to'g'risida qaror qabul qilishga haqlidir.

Markaziy bank olinayotgan ulushning miqdorini belgilashga va mo'ljallanilayotgan olishni bozorning iqtisodiy ehtiyojlari nuqtai nazaridan baholashga haqli emas.

Ayni bir bankning o'zidan hal qiluvchi egalikni olish yoki ko'paytirish uchun bir vaqtning o'zida ikki yoki undan ortiq ariza berilganda Markaziy bank potensial oluvchilarni teng shartlar asosida ko'rib chiqadi.

Potensial oluvchini baholash tartibi va shartlari Markaziy bank tomonidan belgilanadi.

Oldingi tahrirga qarang.

Ushbu moddaning talablari ariza beruvchi tomonidan bank tashkil etishga doir dastlabki ruxsatnomani berish uchun hujjatlarni taqdim etish chog'ida muassislarni bevosita va bilvosita egalik qiluvchilarni, shu jumladan oxirgi benefitsiar mulkdorlarni baholashga nisbatan ham tatbiq etiladi.

(24-moddaning sakkizinchi qismi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

25-modda. Aksiyadorning muvofiqligi to'g'risidagi talablarga rioya etmaslik

Markaziy bank hal etuvchi egalikka bevosita yoki bilvosita egalik qiluvchiga, shu jumladan oxirgi benefitsiar mulkdorga nisbatan choralar va sanksiyalar qo'llashga quyidagi hollarda haqlidir, agar ular:

Oldingi tahrirga qarang.

banklar va bank faoliyati to'g'risidagi qonunchilik talablariga mos bo'lmasa;

(25-modda birinchi qismining ikkinchi xatboshisi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

bankka uning barqaror moliyaviy holatiga xavf tug'dirishi mumkin bo'lgan tarzda ta'sir ko'rsatayotgan bo'lsa;

oxirgi benefitsiar mulkdorning shaxsi to'g'risidagi axborotni taqdim etmagan bo'lsa.

Markaziy bank bankning aksiyalarini olishga doir dastlabki ruxsatnomani olmasdan turib kelishilgan faoliyat natijasida hal qiluvchi egalikka ega bo'lgan aksiyadorlarga nisbatan choralar va sanksiyalar qo'llashga haqli.

Ushbu moddaning **birinchi** va **ikkinchi qismlarida** ko'rsatilgan hollarda Markaziy bank quyidagi choralar hamda sanksiyalarni alohida-alohida yoki jamlangan tarzda qo'llaydi:

ovoz berish, aksiyadorlarning navbatdan tashqari yig'ilishini chaqirish va o'tkazishni talab qilish, kun tartibiga masalalarni kiritish, bank kuzatuv kengashi va boshqaruvi a'zoligiga nomzodlar ko'rsatish hamda bank foydasining bir qismini dividendlar tarzida olish huquqini to'xtatib qo'yadi;

ovoz berish huquqi to'xtatib qo'yilgan shaxslar tomonidan bank aksiyalari sotilishi to'g'risida qaror qabul qiladi;

bank aksiyalarini olishga doir berilgan dastlabki ruxsatnomani chaqirib oladi.

Hal qiluvchi egalikka ega bo'lgan aksiyadorlar o'ziga tegishli aksiyalarni bankning aksiyalarini olishga doir dastlabki ruxsatnoma chaqirib olingan kundan e'tiboran uch oy ichida sotishi kerak.

Ushbu moddaga muvofiq o'ziga nisbatan choralar va sanksiyalar qo'llanilgan shaxslar tegishli bankning, shuningdek boshqa banklarning aksiyalariga bevosita yoki bilvosita egalik qilishga haqli emas.

26-modda. Hal qiluvchi egalik sotib olinganligi, o'zgartirilganligi yoki boshqalarga berilganligi to'g'risidagi xabarnoma

Hal qiluvchi egalikka bevosita yoki bilvosita egalik qiluvchi, shu jumladan oxirgi benefitsiar mulkdor quyidagi hollarda Markaziy bankni va bankni o'n kunlik muddatda yozma shaklda, shu jumladan elektron shaklda xabardor qilishi shart:

bank aksiyalarini olishga doir dastlabki ruxsatnoma olingan bitim amalga oshirilganda;

dastlabki ruxsatnoma olingan, ushbu Qonun 22-moddasining **birinchi qismida** belgilangan aksiyalar ulushi ko'payganda;

bank ustav kapitalidagi hal qiluvchi egalikni boshqa shaxsga berish yoki kamaytirish to'g'risida qaror qabul qilish natijasida hal qiluvchi egalik tegishincha ellik foizdan, yigirma foizdan yoki besh foizdan kam bo'lib qolganda;

ushbu Qonunning 22-moddasi **birinchi qismida** belgilangan hajmdagi bank aksiyalari shaxs tomonidan o'ziga bog'liq bo'lmagan holatlarda olinganda.

Ushbu moddaning **birinchi qismida** nazarda tutilgan hollarda bank xabarnoma olingan kundan e'tiboran bir kunlik muddatda Markaziy bankni yozma shaklda, shu jumladan elektron shaklda xabardor qilishi kerak.

27-modda. Xabardor qilish majburiyati

Bank bankning ustav kapitalidagi ulushlarga bevosita va bilvosita egalik qiluvchilarning, shu jumladan oxirgi benefitsiar mulkdorning shaxsi va ulushining miqdori to'g'risidagi mavjud ma'lumotlarni Markaziy bankning so'rovnomasiga binoan taqdim etishi shart.

Oldingi tahrirga qarang.

Bank aksiyalariga bevosita va bilvosita egalik qiluvchining, shu jumladan oxirgi benefitsiar mulkdorning banklar va bank faoliyati to'g'risidagi qonunchilik talablariga muvofiqligini baholashdan o'tkazish maqsadida Markaziy bankning yoki bankning so'rovnomasiga binoan ushbu shaxslar:

(27-modda ikkinchi qismining birinchi xatboshisi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

tadbirkorlik faoliyati to'g'risidagi ma'lumotlarni, shu jumladan yillik moliyaviy hisobotni;

o'ziga aloqador shaxslar va egalik qiluvchi bankka nisbatan birgalikda harakat qilayotgan shaxslar to'g'risidagi ma'lumotlarni, shuningdek Markaziy bankka zarur bo'lgan boshqa axborotni taqdim etishi shart.

Markaziy bank predmeti yoki mazmuni quyidagilardan iborat bo'lgan har qanday tuzilgan kelishuv to'g'risida xabardor etilishi kerak:

bank aksiyadorlarining umumiy yig'ilishlarida yoki bank ustidan nazoratni amalga oshiruvchi shaxslarning umumiy yig'ilishlarida ovoz berish huquqini kelishilgan holda amalga oshirish;

bank boshqaruvi organi a'zolarining yoki bank ustidan nazoratni amalga oshiruvchi shaxslarning kelishilgan holda faoliyat ko'rsatishi;

bank boshqaruvi yoki kuzatuv kengashi a'zolarining nomzodlarning yoxud bank ustidan nazoratni amalga oshiruvchi shaxslarning ko'pchiligi nomzodini ko'rsatish huquqini amalga oshirish.

Ushbu moddaning **uchinchi qismida** ko'rsatilgan xabarnoma kelishuv imzolangan sanadan e'tiboran besh ish kuni ichida yoki uning mavjudligini oshkor etuvchi holatlar aniqlangan paytdan e'tiboran darhol Markaziy bankka kelishuv taraflari yoki bankning boshqaruv organlari tomonidan yuborilishi kerak.

Oldingi tahrirga qarang.

Hal qiluvchi egalikka bevosita yoki bilvosita egalik qiluvchi, shu jumladan oxirgi benefitsiar mulkdor aksiyadorning banklar va bank faoliyati to'g'risidagi qonunchilik talablariga muvofiqligini baholashga ta'sir ko'rsatishi mumkin bo'lgan holatlar to'g'risida shunday holatlar vujudga kelgan kundan e'tiboran besh ish kuni ichida Markaziy bankni xabardor qilishi kerak.

(27-moddaning beshinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

28-modda. Banklar tomonidan o'z aksiyalarini sotib olish

Banklar o'z aksiyalarini sotib olish uchun Markaziy bankning dastlabki ruxsatnomasini olishi shart. Bank tomonidan sotib olinadigan o'z aksiyalarining summasi bank ustav kapitalining o'n foizidan oshishi mumkin emas.

Bank o'z aksiyalarini sotib olishga doir dastlabki ruxsatnomani olish uchun Markaziy bankka arizani va o'z aksiyalarini sotib olish sabablarini ko'rsatgan holda bank aksiyadorlari umumiy yig'ilishining qarorini taqdim etadi.

Bankning moliyaviy holati qoniqarsiz bo'lsa, shuningdek ushbu sotib olish prudensial normativlarga rioya etilmasligiga olib kelsa, Markaziy bank dastlabki ruxsatnomani berishga haqli emas.

3-bob. Filiallar va vakolatxonalar

Oldingi tahrirga qarang.

29-modda. Banklarning O'zbekiston Respublikasi hududidagi filiallari va boshqa alohida bo'linmalari

Banklar O'zbekiston Respublikasida filiallar, bank xizmatlari ofislari va boshqa alohida bo'linmalar ochishi mumkin.

Bank filiali bankning yuridik shaxs bo'lmagan, bank nomidan bank faoliyatini amalga oshiruvchi va bank tomonidan o'ziga berilgan vakolatlar doirasida harakat qiluvchi alohida bo'linmasidir.

Banklar o'z filiali yoki bank xizmatlari ofisini ochganlik yoki tugatganlik to'g'risida Markaziy bankka belgilangan tartibda xabarnoma yuborishi shart.

Bank filiali yoki bank xizmatlari ofisini ochganlik to'g'risidagi xabarnomaga quyidagi hujjatlar ilova qilinadi:

filial yoki bank xizmatlari ofisini ochish to'g'risida bankning vakolatli organining qarori;
filial rahbari va bosh buxgalteri to'g'risidagi ma'lumotlar (filial ochilgan taqdirda);

filial yoki bank xizmatlari ofisi joylashgan yerdagi Markaziy bank hududiy bosh boshqarmasining filial yoki bank xizmatlari ofisi binolari, ularning muhofaza qilinishi ta'minlanganligi, uskunalar, tashkiliy-texnika vositalari bilan jihozlanganligining va dasturiy ta'minotning Markaziy bank talablariga muvofiqligi to'g'risidagi xulosasi.

Bank filiali yoki bank xizmatlari ofisini ochganlik to'g'risidagi xabarnomani Markaziy bankka yuborish uchun quyidagi talablar va shartlarga rioya etilishi lozim:

bankning barqaror moliyaviy holati;

filial rahbari va bosh buxgalterining malakasi Markaziy bank tomonidan belgilangan malaka talablariga muvofiqligi (filial ochilgan taqdirda);

filial yoki bank xizmatlari ofisi binolari, ularning muhofazasi ta'minlanishi, uskunalar, tashkiliy-texnika vositalari va dasturiy ta'minoti bilan jihozlanishi Markaziy bank talablariga muvofiqligi.

Bank filiali, uning faoliyati boshlanganligi to'g'risidagi axborot Markaziy bankning rasmiy veb-saytida e'lon qilinadi.

Bank filialini yoki bank xizmatlari ofisini ochganlik va tugatganlik to'g'risida Markaziy bankni belgilangan tartibda xabardor qilmay amalga oshiriladigan faoliyat qonunga xilofdir.

Bank tomonidan filialni tugatganlik to'g'risida qaror qabul qilingan taqdirda, bank mijozlarni filial tugatilishidan o'n besh kun oldin xabardor qilishi va ularning oldidagi majburiyatlar bajarilishini ta'minlash choralarini ko'rishi yoki bu majburiyatlarni mijoz bilan kelishilgan holda boshqa filialga o'tkazishi shart.

Bank filialni tugatganlik to'g'risida qaror qabul qilingan sanadan e'tiboran ikki ish kuni ichida Markaziy bankni bu haqda xabardor qilishi va mijozlar oldidagi majburiyatlarni bajarishni ta'minlashga doir rejani taqdim etishi kerak.

Bank vakolatxonasi O'zbekiston Respublikasining qonunchiligiga muvofiq ochiladi.

(29-modda O'zbekiston Respublikasining 2021-yil 12-oktabrdagi O'RQ-721-sonli Qonuni tahririda — Qonunchilik ma'lumotlari milliy bazasi, 12.10.2021-y., 03/21/721/0952-son)

30-modda. Chet el banklarining O'zbekiston Respublikasi hududidagi filiallari va vakolatxonalari

O'zbekiston Respublikasida chet el banklari tomonidan filiallar tashkil etilishiga yo'l qo'yilmaydi.

Chet el bankining O'zbekiston Respublikasi hududida joylashgan hamda bank faoliyatini va boshqa tijorat faoliyatini amalga oshirish huquqsiz bankning manfaatlarini ifodalovchi alohida bo'linmasi chet el bankining vakolatxonasidir.

O'zbekiston Respublikasi hududida chet el bankining vakolatxonasi Markaziy bank tomonidan akkreditatsiya qilinadi.

31-modda. Banklarning chet eldagi shu'ba banklari, filiallari va vakolatxonalari

Oldingi tahrirga qarang.

Banklar Markaziy bankning ruxsatnomasi bilan quyidagi hollarda chet elda shu'ba banklar ochishi va filiallar tashkil etishi, chet el banklarining kapitalida ishtirok etishi, shu jumladan chet el banklarini tashkil etishda ishtirok etishi mumkin, bundan mikromoliya banklari mustasno:

(31-modda birinchi qismining birinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Markaziy bank va qabul qiluvchi mamlakatning bank nazorati organi bilan axborot ayirboshlash to'g'risida kelishuv mavjud bo'lganda;

Oldingi tahrirga qarang.

qabul qiluvchi mamlakatning qonunchilik va uning qo'llanilish uslubiyoti Markaziy bank tomonidan shu'ba bank, filial ustidan nazorat vazifalarini bajarishiga to'sqinlik qilmaganda;

(31-modda birinchi qismining uchinchi xatboshisi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

bankning boshqaruvi va moliyaviy holati shu'ba bank, filial orqali amalga oshiriladigan, rejalashtirilayotgan faoliyat uchun yetarli bo'lganda;
prudensial normativlar ko'rsatkichlariga rioya etilganda va ular o'sib borganda hamda banklar va bank faoliyati to'g'risidagi qonunning boshqa talablariga muvofiq bo'lganda.

Oldingi tahrirga qarang.

Mikromoliya banklariga chet elda banklar, vakolatxonalar ochish va filiallar tashkil etish, chet el banklarining kapitalida, shu jumladan chet el banklarini tashkil etishda ishtirok etish taqiqlanadi.

(31-modda O'zbekiston Respublikasining 2025-yil 11-fevraldagi O'RQ-1026-sonli Qonuniga asosan ikkinchi qism bilan to'ldirilgan — Qonunchilik ma'lumotlari milliy bazasi, 12.02.2025-y., 03/25/1026/0131-son)

Oldingi tahrirga qarang.

Bankning shu'ba banklari hamda vakolatxonalar ular ochiladigan va (yoki) tashkil etiladigan mamlakat qonunchiligiga muvofiq ochiladi va (yoki) filiallari tashkil etiladi.

(31-moddaning ikkinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Bank tomonidan chet elda vakolatxona ochish, shu'ba bankni, vakolatxonani yoki filialni yopish, shuningdek chet el banki aksiyalarini sotish to'g'risida qaror qabul qilingan taqdirda, bank bunday qaror qabul qilingan sanadan e'tiboran o'ttiz kun ichida Markaziy bankni xabardor qilishi va ushbu qaror bankning moliyaviy barqarorligiga qanday ta'sir ko'rsatishi to'g'risida axborot taqdim etishi shart.

Markaziy bank qabul qiluvchi mamlakatdagi bank nazorati organini O'zbekiston Respublikasining yuridik shaxsi bo'lgan, mazkur mamlakat hududida shu'ba bank, vakolatxona yoki filial orqali faoliyat ko'rsatayotgan bankning litsenziyasi chaqirib olinayotganligi to'g'risida xabardor qilishi kerak.

4-bob. Bankning korporativ boshqaruvi

32-modda. Bankning boshqaruv organlari

Aksiyadorlarning umumiy yig'ilishi, bankning kuzatuv kengashi va boshqaruvi bankning boshqaruv organlaridir.

Aksiyadorlarning umumiy yig'ilishi bankning yuqori boshqaruv organidir.

Bank korporativ boshqaruvga oid siyosatni ishlab chiqishi va tasdiqlashi shart.

Bank kuzatuv kengashining va boshqaruvining vakolatlari ijro etish uchun uchinchi shaxslarga o'tkazilishi mumkin emas, bundan ushbu Qonunda nazarda tutilgan hollar mustasno.

33-modda. Korporativ boshqaruv

Bank:

javobgarlikning shaffof sohalarini;

bank duchor bo'lgan yoki duchor bo'lishi mumkin bo'lgan tavakkalchiliklarni aniqlash, boshqarish, monitoring qilish va ular haqida xabardor etishning samarali tartib-taomillarini (tanglik vaziyatining sodir bo'lishi ssenariylarini);

operatsiyaga oid tavakkalchilikning o'rnini qoplash uchun likvidlikni va kapitalning yetarliligini baholash tartib-taomilini;

ichki nazoratning tegishli mexanizmlarini, shu jumladan buxgalteriya hisobini yuritish tartibini;

tavakkalchiliklarni oqilona hamda samarali boshqarishga ko'maklashadigan hamda mos keladigan xodimlarni mukofotlashning siyosati va usullarini belgilovchi korporativ boshqaruvning aniq ifodalangan tashkiliy tuzilmasiga ega bo'lishi kerak.

Korporativ boshqaruvning tashkiliy tuzilmasi, tartib-taomillari va mexanizmlari kompleks tusga ega bo'lishi hamda bank amalga oshirayotgan biznes-model va faoliyatga xos bo'lgan tavakkalchiliklarning xususiyati, miqyosi hamda murakkabligiga muvofiq bo'lishi kerak. Ichki

nazorat mexanizmlari kamida boshqaruv vazifalari bajarilishini va tavakkalchiliklar baholanishini hamda ichki audit talablariga rioya etilishini ta'minlashi kerak.

Banklardagi korporativ boshqaruvga doir talablar Markaziy bank tomonidan belgilanadi.

34-modda. Bankning kuzatuv kengashi

Bankning kuzatuv kengashi bank faoliyatiga umumiy rahbarlikni amalga oshiradi, boshqaruvga oid qarorlar qabul qilish jarayonida nazorat va tekshiruv vazifasini bajaradi hamda umuman bankning faoliyati va moliyaviy barqarorligi uchun javobgardir.

Bankning kuzatuv kengashi bankni samarali va tadbirli boshqarishni, shu jumladan bank boshqaruvi a'zolari o'rtasida vakolatlarning hamda javobgarlikning taqsimlanishini, manfaatlar to'qnashuvining oldi olinishini va bartaraf etilishini ta'minlaydigan boshqaruv tashkiliy tuzilmasini belgilaydi hamda uning joriy etilishi ustidan nazorat va tekshiruvni amalga oshiradi.

Bankning kuzatuv kengashi a'zolari bankning oqilona korporativ boshqaruviga ko'maklashishi hamda o'z vakolatlarini va majburiyatlarini bajarish chog'ida bankning, uning omonatchilari va aksiyadorlarining qonuniy manfaatlarini inobatga olishi, shuningdek Markaziy bank bilan samarali hamkorlikni ta'minlashi kerak.

Bank kuzatuv kengashining "Aksiyadorlik jamiyatlari va aksiyadorlarning huquqlarini himoya qilish to'g'risida"gi O'zbekiston Respublikasi **Qonunida** nazarda tutilgan vakolatlari jumlasiga qo'shimcha ravishda quyidagilar kiradi:

strategik maqsadlarni, korporativ boshqaruv siyosatini, bankning boshqa ichki siyosatlarini, shu jumladan tavakkalchiliklarni aniqlash, boshqarish, monitoring qilish va ular to'g'risida xabardor etish, kapitalning yetarliligini lozim darajada saqlab turish siyosatini tasdiqlash hamda ularning amalga oshirilishi ustidan nazorat qilish;

aktivlarni tasniflash asosida aktivlar bo'yicha ehtimoldagi zararlarga qarshi yaratiladigan zaxiralar shakllantirilishi ustidan nazorat qilish, shuningdek bankning kapital va umumiy zaxiralarining yetarli darajada saqlab turilishini ta'minlash;

manfaatlar to'qnashuvining oldini olish va uni bartaraf etish tartibini tasdiqlash;

bankning moliyaviy holatini tiklash rejalarini tasdiqlash;

bankning boshqaruvi ustidan nazoratni amalga oshirish;

bankning qabul qilingan biznes-rejasi bajarilishi ustidan nazorat qilish, shuningdek har chorakda bankning faoliyati natijalari to'g'risida bank boshqaruvining hisobotini eshitish;

bankning ichki audit xizmati faoliyatini tashkil etish, shuningdek bank ichki audit xizmatining choraklik hisobotlari asosida bank boshqaruvi tomonidan bank strategiyalari va siyosatlariga rioya etilishini baholashdan o'tkazish;

bank boshqaruvi a'zolari tomonidan taqdim etilgan axborotni, takliflarni va tushuntirishlarni o'rganish, muhokama qilish hamda ular bo'yicha bahslashish;

bank faoliyatini boshqarish tizimi samaradorligini, shu jumladan bank boshqaruvi prinsiplari monitoringini va ularni davriy baholashni amalga oshirish hamda aniqlangan kamchiliklarni bartaraf etish uchun tegishli choralarni ko'rish;

bir yilda kamida bir marta amalga oshirilgan nazorat va tekshiruv faoliyati to'g'risida aksiyadorlarning umumiy yig'ilishiga hisobot taqdim etish;

yillik moliyaviy hisobotlarni tasdiqlash hamda buxgalteriya hisobi va moliyaviy hisobotlar tizimining yaxlitligini ta'minlash;

bankning uzoq muddatli moliyaviy manfaatlarini va Markaziy bank tomonidan kapitalga nisbatan belgilangan talablarni hisobga olgan holda prudensial talablarga rioya etilishini ta'minlash.

Bankning kuzatuv kengashi a'zolari soni, bank aksiyadorlari sonidan qat'i nazar, besh kishidan kam bo'lmagan miqdorda toq sonda bo'lishi lozim. Kuzatuv kengashi a'zolarining ko'pchiligi bankka aloqador shaxslar bo'lmasligi kerak, bundan ularning kuzatuv kengashidagi a'zoliigi mustasno.

Bank kuzatuv kengashi a'zolari o'z mulohazalarining mustaqilligi bo'yicha talablarga rioya etishi kerak.

Quyidagi hollarda shaxs kuzatuv kengashi a'zoliigiga saylanishi mumkin emas yoki saylangan shaxs kuzatuv kengashi a'zoliigi huquqidan mahrum etiladi, agar:

shaxs ikki yoki undan ortiq bankning kuzatuv kengashi a'zosi bo'lsa yoki a'zo bo'lish niyatida bo'lsa, bundan mazkur banklar bir bank guruhiga tegishli bo'lgan hollar mustasno; shaxsning vakolatlari Markaziy bank talabiga ko'ra muddatidan ilgari tugatilgan bo'lsa.

35-modda. Bank boshqaruvi

Bank boshqaruvi bankni boshqarishning ijro etuvchi organi bo'lib, u bankning kuzatuv kengashi tomonidan tasdiqlangan faoliyat strategiyasi va uni boshqarish tizimiga muvofiq bankning faoliyatiga operativ boshqaruvni amalga oshiradi hamda bankning faoliyati uchun javobgarlikni to'liq zimmasiga oladi.

Bank boshqaruvi:

strategik maqsadlarni, korporativ boshqaruv siyosatini, bankning boshqa ichki siyosatlarini, shu jumladan tavakkalchiliklarni aniqlash, boshqarish, monitoring qilish va tavakkalchiliklar to'g'risida xabardor etish, kapitalning yetarliligini lozim darajada saqlab turish siyosatini amalga oshirishi;

bankning tegishli va shaffof tashkiliy tuzilmasini, shu jumladan vakolatlarni va javobgarlikni bank xodimlari o'rtasida o'z vakolatlari doirasida taqsimlashni ta'minlashi;

bank xodimlarining faoliyati ustidan nazoratni amalga oshirishi;

bankning qabul qilingan yillik biznes-rejasini bajarishi, shuningdek bank aksiyadorlarining umumiy yig'ilishiga va kuzatuv kengashiga bajarilgan ishlar, bankka nisbatan qo'llanilgan choralalar hamda sanksiyalar to'g'risidagi hisobotni davriy ravishda taqdim etishi;

Oldingi tahrirga qarang.

bank ustavida hamda banklar va bank faoliyati to'g'risidagi qonunchilikda nazarda tutilgan boshqa majburiyatlarni bajarishi shart.

(35-modda ikkinchi qismining oltinchi xatboshisi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Bank boshqaruvi bank aksiyadorlarining umumiy yig'ilishiga va kuzatuv kengashiga hisobdordir.

36-modda. Rahbarlik prinsiplarini qo'llash

Bank kuzatuv kengashining va boshqaruvining a'zolari, shuningdek muhim ahamiyatga ega xodimlari benuqson ishchanlik obro'siga, bank tavakkalchiliklarining samarali boshqarilishini, o'z vakolatlari doirasida asosli qarorlar qabul qilinishini ta'minlash uchun zarur bo'lgan tajribaga, bilim va ko'nikmalarga ega bo'lishi kerak.

Oldingi tahrirga qarang.

Bank bankning kuzatuv kengashi va boshqaruvi a'zolari, shuningdek muhim ahamiyatga ega xodimlari banklar va bank faoliyati to'g'risidagi qonunchilik talablariga doimo muvofiq bo'lishini ta'minlashi shart.

(36-moddaning ikkinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Markaziy bank bank kuzatuv kengashining va boshqaruvning a'zoriga hamda muhim ahamiyatga ega xodimlar lavozimlariga ko'rsatilayotgan nomzodlarni ularning lavozimga kirishishidan oldin kelishib oladi. Agar muhim ahamiyatga ega xodimlarni obyektiv sabablarga ko'ra oldindan kelishib olishning imkoni bo'lmasa, bank keyinchalik rozilik olish uchun so'rovnomaga yuborishi kerak.

Bank boshqaruvi a'zolari va muhim ahamiyatga ega xodimlari ish beruvchining roziligi bilan boshqa tashkilotlarda o'rindoshlik asosida ishlashi mumkin, bundan ularning boshqa banklar va tashkilotlarda ishga joylashuvi manfaatlar to'qnashuviga olib kelishi mumkin bo'lgan hollar mustasno.

Bank kuzatuv kengashining va boshqaruvining a'zolarini, shuningdek muhim ahamiyatga ega xodimlarni baholash shartlari, baholash uchun zarur hujjatlar, malaka talablariga muvofiqlik mezonlari, shuningdek ularni kelishib olish tartibi Markaziy bank tomonidan belgilanadi.

37-modda. Korrupsiyaning oldini olish choralari, bank xodimlarining odob-axloq qoidalari va manfaatlar to'qnashuviga yo'l qo'yilmasligi

Banklar bankning saylanadigan organlari a'zolari va xodimlari tomonidan rioya etilishi majburiy bo'lgan:

korrupsiyaning oldini olish bo'yicha choralarni;

odob-axloq qoidalarini;

manfaatlar to'qnashuvining oldini olish va uni bartaraf etish siyosatini ishlab chiqadi hamda amalga oshiradi.

Bankka yoki bankning nazorati ostidagi yuridik shaxsga aloqador bo'lgan shubhali faoliyat, firibgarlik yoxud suiiste'molliklar to'g'risida xabar qilgan bank kuzatuv kengashi, boshqaruvi a'zosining yoki xodimining shaxsi oshkor qilinmasligi kerak.

5-bob. Prudensial talablar va tavakkalchiliklarni boshqarish

38-modda. Banklar va bank guruhleri tomonidan prudensial normativlarga rioya etish

Banklarning moliyaviy barqarorligini ta'minlash hamda omonatchilar va kreditorlarning manfaatlarini himoya qilish maqsadida banklar va bank guruhleri hisoblab chiqarish tartibi va yo'l qo'yiladigan qiymatlari Markaziy bank tomonidan belgilanadigan prudensial normativlarga rioya etishi shart.

Oldingi tahrirga qarang.

Banklar va bank guruhleri uchun prudensial normativlar quyidagilarni o'z ichiga oladi, bundan mikromoliya banklari mustasno:

(38-modda ikkinchi qismining birinchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

kapitalning monandlik koeffitsiyentlari;

bir qarz oluvchiga yoki o'zaro aloqador qarz oluvchilar guruhiga doir tavakkalchilikning eng ko'p miqdori;

yirik kredit tavakkalchiliklarining va investitsiyalarning eng ko'p miqdori;

sohalar kesimida to'planish (konsentratsiya) koeffitsiyentlari;

likvidlik koeffitsiyentlari;

bankning aloqador shaxslari uchun tavakkalchilikning eng ko'p miqdori;

ta'minotsiz kreditlar (ishonchga asoslangan kreditlar) berishning eng ko'p miqdori;

bankning aktivlarini tasniflashga va ularning sifatini baholashga, bank aktivlari bo'yicha ehtimoliy yo'qotishlarga qarshi zaxiralarni aktivlarni tasniflash asosida shakllantirishga doir talablar;

Oldingi tahrirga qarang.

(31-modda ikkinchi qismining o'ninchi xatboshisi O'zbekiston Respublikasining 2025-yil 11-fevraldagi O'RQ-1026-sonli Qonuniga asosan chiqarilgan — Qonunchilik ma'lumotlari milliy bazasi, 12.02.2025-y., 03/25/1026/0131-son)

yuridik shaxslarning ustav fondlaridagi (ustav kapitallaridagi) sotib olinadigan ulushlar va aksiyalarning eng ko'p miqdori;

ko'chmas mulkni va boshqa mol-mulkni sotib olishga hamda unga egalik qilishga doir talablar;

ochiq valyuta mavqeyi limitlari;

umum qabul qilingan xalqaro amaliyotga muvofiq Markaziy bank tomonidan belgilanadigan boshqa prudensial normativlar.

Oldingi tahrirga qarang.

Mikromoliya banklari uchun prudensial normativlar quyidagilarni o'z ichiga oladi:

kapitalning monandligi koeffitsiyentlarini;

bir qarz oluvchi yoki o‘zaro aloqador qarz oluvchilar guruhiga doir tavakkalchilikning eng ko‘p miqdorini;

likvidlilik koeffitsiyentlarini;

mikromoliya bankining aloqador shaxslari uchun tavakkalchilikning eng ko‘p miqdorini;

umumqabul qilingan xalqaro amaliyotga muvofiq Markaziy bank tomonidan belgilanadigan boshqa prudensial normativlarni.

Mikromoliya bankining ustav kapitali miqdori ushbu Qonun 13-moddasining **birinchi qismida** ko‘rsatilgan bank ustav kapitalining miqdoriga muvofiq bo‘lgan hollarda, mazkur mikromoliya banki ushbu moddaning ikkinchi qismida nazarda tutilgan prudensial normativlarga rioya etishi shart. Bunda bir qarz oluvchiga yoki o‘zaro aloqador qarz oluvchilar guruhiga doir tavakkalchilikning eng ko‘p miqdori ushbu Qonun 7-moddasi uchinchi qismining **uchinchi xatboshisida** belgilangan miqdordan oshmasligi kerak.

(38-modda O‘zbekiston Respublikasining 2025-yil 11-fevraldagi O‘RQ-1026-sonli Qonuniga asosan uchinchi va to‘rtinchi qismlar bilan to‘ldirilgan — Qonunchilik ma‘lumotlari milliy bazasi, 12.02.2025-y., 03/25/1026/0131-son)

Banklar aktivlar bo‘yicha yo‘qotishlarga oid tavakkalchilikni kamaytirish maqsadida o‘zining kapitalini va likvid resurslarini yetarli darajada saqlab turishi, aktivlar bo‘yicha ehtimoliy yo‘qotishlarga qarshi zaxiralarni aktivlarni tasniflash asosida shakllantirishi, shuningdek o‘z aktivlarining diversifikatsiya qilinishini ta‘minlashi kerak.

Markaziy bank banklar, banklar guruhi va tizimli ahamiyatga ega banklar uchun mazkur bankka, tizimli ahamiyatga ega bankka va banklar guruhiga xos tavakkalchilik omillarining eng ko‘p o‘zgarishlari chog‘ida yuzaga keladigan ehtimoldagi zararlarning o‘rnini qoplash uchun likvidlik va kapitalning yetarlilik koeffitsiyentlariga qo‘shimcha ustamalar belgilashga haqli.

Prudensial normativlarga kelgusidagi o‘zgartishlar ushbu o‘zgartishlar amalga kiritilishidan kamida bir oy oldin Markaziy bank tomonidan rasman e‘lon qilinadi.

39-modda. Foydaning taqsimlanishini cheklash

Bank aksiyadorlarga dividendlar to‘lash, shuningdek bankning kuzatuv kengashi, boshqaruvi a‘zolari va xodimlarini mukofotlash orqali foydani taqsimlashni quyidagi hollarda amalga oshirishga haqli emas:

prudensial normativlar Markaziy bank tomonidan belgilangan talablarga muvofiq bo‘lmaganda yoki ular mazkur taqsimlash oqibatida buzilganda;

Oldingi tahrirga qarang.

to‘lovga qobiliyatsiz bo‘lganda yoki mazkur taqsimlash oqibatida to‘lovga qobiliyatsizlik alomatlari yuzaga kelganda;

(39-modda birinchi qismining uchinchi xatboshisi O‘zbekiston Respublikasining 2024-yil 21-fevraldagi O‘RQ-911-sonli Qonuni tahririda — Qonunchilik ma‘lumotlari milliy bazasi, 22.02.2024-y., 03/24/911/0142-son)

Markaziy bankning ijro etilishi majburiy bo‘lgan ko‘rsatmasida aks ettirilgan, shu jumladan axborotni oshkor etish borasida ko‘rsatilgan kamchiliklar bartaraf etilmaganda yoki ularni bartaraf etish imkoniyati mavjud bo‘lmaganda;

Markaziy bankning foydani taqsimlamaslik to‘g‘risida bankka nisbatan talabi mavjud bo‘lganda.

Banklar quyidagi hollarda foydani taqsimlash uchun Markaziy bankning roziligini olishi kerak:

ushbu modda birinchi qismining **birinchi xatboshisida** ko‘rsatilgan to‘lovlarning umumiy summasi bankning o‘z kapitalining o‘n foizidan ortganda;

joriy yoki o‘tgan chorakda va (yoki) moliya yilida zarar mavjud bo‘lganda.

40-modda. Majburiy zaxiralash talablari

Banklar Markaziy bank tomonidan belgilangan majburiy zaxiralash talablarini bajarishi shart.

Bank majburiy zaxiralash talablarini bajarmagan taqdirda, Markaziy bank qat'iy tartibda bu bankning Markaziy bankdagi vakillik hisobvarag'idan yetishmayotgan majburiy zaxira mablag'lari miqdoridagi summani, shuningdek ushbu yetishmayotgan summaga nisbatan amaldagi qayta moliyalash yillik stavkasining ikki baravaridan oshmaydigan miqdorda jarima undirib oladi.

41-modda. Bank xizmatlari va operatsiyalarining autsorsingi

Xizmatlar va operatsiyalarning ayrim turlarini bank tomonidan shartnoma asosida va uzluksiz asosda amalga oshirish uchun uchinchi tarafga topshirish bank xizmatlari va operatsiyalarining autsorsingidir (bundan buyon matnda autsorsing deb yuritiladi).

Bank Markaziy bankning ruxsatnomasi olinganidan keyin xizmatlar va operatsiyalarning ayrim turlarini Markaziy bank tomonidan belgilangan talablarga muvofiq autsorsingga topshirish huquqiga ega.

Litsenziya asosida amalga oshiriladigan xizmatlar va operatsiyalarning ayrim turlarini faqat tegishli litsenziya egasiga autsorsingga topshirishga yo'l qo'yiladi.

Bank xizmatlari va operatsiyalarining ayrim turlari o'ziga autsorsingga topshirilgan shaxsning mazkur xizmatlar hamda operatsiyalarni keyinchalik boshqa shaxsga autsorsingga topshirishi taqiqlanadi. Mazkur cheklov bank tomonidan xizmatlar va operatsiyalarning ayrim turlarini autsorsingga topshirish to'g'risidagi shartnomada aks ettirilishi kerak.

Bank autsorsingga topshirilgan xizmatlar va operatsiyalarning ayrim turlari bilan bog'liq tavakkalchiliklarning boshqarilishi uchun javobgar bo'ladi.

Xizmatlar va operatsiyalarning ayrim turlarini autsorsingga topshirishda bank Markaziy bankning talablariga, shu jumladan ichki siyosatlar va hisobotdorlik mavjudligi bo'yicha, shuningdek Markaziy bankka autsorsingga topshirilgan xizmatlar va operatsiyalarning ayrim turlari yuzasidan axborot taqdim etish bo'yicha talablariga javob berishi kerak.

Banklar autsorsingga topshirilgan xizmatlar va operatsiyalarning ayrim turlari tashqi auditdan o'tkazilishini har yili yoki Markaziy bankning talabiga binoan ta'minlashi shart.

Markaziy bank quyidagi hollarda autsorsing shartnomasini bekor qilishni talab etishga haqli:

bank tomonidan autsorsingga topshirilgan xizmatlar va operatsiyalarning lozim darajadagi hamda muntazam ravishdagi nazorati, tekshiruvi va tavakkalchilik boshqaruvi amalga oshirilmaganda;

autsorsing uchun jalb etilgan shaxs faoliyatida bankning o'z majburiyatlarini bajarish qobiliyatiga tahdid soluvchi kamchiliklar mavjud bo'lganda.

42-modda. Bank va banklar guruhining ichki nazoratiga hamda tavakkalchiliklarni boshqarish tizimiga doir talablar

Bank va banklar guruhi Markaziy bank tomonidan belgilangan ichki nazoratga hamda tavakkalchiliklarni boshqarish tizimiga doir talablarga rioya etishi shart. Markaziy bankning talablari bank amalga oshirayotgan faoliyat turining tizimli ahamiyatini, o'ziga xos xususiyatini, miqyosini va murakkabligini mutanosiblik prinsipini inobatga olgan holda hisobga oladi.

Bank va banklar guruhining ichki nazoratiga hamda tavakkalchiliklarni boshqarish tizimiga doir Markaziy bank talablari jumlasiga quyidagilar kiradi:

Oldingi tahrirga qarang.

ichki va tashqi foydalanuvchilar uchun moliyaviy, nazoratga oid hamda boshqa hisobotlarning to'liqligini, ishonchliligini va o'z vaqtidaligini, shuningdek axborot xavfsizligini va kiberxavfsizligini ta'minlash;

(42-modda ikkinchi qismining ikkinchi xatboshisi O'zbekiston Respublikasining 2024-yil 20-sentabrdagi O'RQ-964-sonli Qonuni tahririda — Qonunchilik ma'lumotlari milliy bazasi, 21.09.2024-y., 03/24/964/0736-son — 2024-yil 22-dekabrda kuchga kiradi)

bank tomonidan prudensial talablar bajarilishini ta'minlash;

bankda bank uchun ahamiyatli bo'lgan tavakkalchiliklarni aniqlash va boshqarish, stress-testdan o'tkazish bo'yicha tasdiqlangan siyosatining, shuningdek bank uchun ahamiyatli tavakkalchiliklar va kapital bo'yicha hisobot tizimining mavjudligi;

bank uchun ahamiyatli tavakkalchiliklarni boshqarishga va ularning samaradorligini baholashga doir siyosatlarining bank tomonidan izchil amalga oshirilishi hamda ularga rioya etilishi; bankning ichki hujjatlarida belgilangan tavakkalchiliklarning eng yuqori miqdorlariga va kapitalning monandligiga, tavakkalchiliklarni boshqarish bo'yicha bankda qo'llanilayotgan tartib-taomillarning samaradorligiga hamda ularni qo'llash izchilligiga bankning rioya etishi ustidan kuzatuv kengashi tomonidan nazoratni amalga oshirish.

Oldingi tahrirga qarang.

43-modda. Jinoiy faoliyatdan olingan daromadlarni legallashtirishga, terrorizmni moliyalashtirishga va ommaviy qirg'in qurolini tarqatishni moliyalashtirishga qarshi kurashish to'g'risidagi qonunchilik talablariga banklar tomonidan rioya etilishi

Banklar jinoiy faoliyatdan olingan daromadlarni legallashtirishga, terrorizmni moliyalashtirishga va ommaviy qirg'in qurolini tarqatishni moliyalashtirishga qarshi kurashish to'g'risidagi qonunchilik talablariga rioya etishi shart.

(43-modda O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

44-modda. Bankka aloqador bo'lgan shaxslar bilan bitimlar tuzish

Banklarning bankka aloqador bo'lgan shaxslar bilan yoki bunday shaxslar nomidan harakat qiladigan shaxslar bilan tuzadigan shartnomalari bankka aloqador bo'lmagan shaxslar uchun nazarda tutilgan shartnomalarga qaraganda ancha qulay shartlarga asoslangan hollarda ularning bunday shartnomalarni tuzishi taqiqlanadi.

Ancha qulay shartlarni taqdim etish quyidagilarni anglatadi:

bank bankka aloqador bo'lmagan shaxslar bilan ularning tabiati, maqsadi, xususiyatlari va bankning tavakkalchiligidan kelib chiqib tuzmaydigan bitimni bankka aloqador shaxs bilan yoki shunday shaxsning manfaatlarini ko'zlab tuzilishini;

boshqa shaxslarga nisbatan moliyaviy operatsiyalarni amalga oshirganligi uchun pastroq tarzda mukofotlar olinishini va to'lovlarni pastroq tarzda undirilishini yoki ta'minotni boshqa shaxslardan talab qilinadigan qiymatdan yuqoriroq qiymat bo'yicha qabul qilinishini.

Bank o'ziga aloqador shaxslarga ta'minlanmagan (ishonchga asoslangan kreditlar) kreditlar (qarzlari) berishi mumkin emas.

Bank o'ziga aloqador shaxslar bilan ushbu moddaning talablarini hisobga olgan holda faqat bank kuzatuv kengashining qaroriga ko'ra bitimlar tuzilishi mumkin. Agar shaxs bank bilan bitim tuzish bo'yicha shartnoma imzolanganidan keyin bankka aloqador shaxsga aylansa, bankning kuzatuv kengashi shaxs bankka aloqador shaxsga aylangan kundan e'tiboran o'ttiz kun ichida mazkur shartnomani ma'qullashi yoki uni bekor qilish to'g'risida farmoyish berishi kerak.

Kuzatuv kengashining a'zosi bank bilan o'zi o'rtasida yoki o'ziga aloqador shaxs o'rtasida tuzilgan yoki tuziladigan bitim masalasi ko'rilayotgan kuzatuv kengashi yig'ilishida hozir bo'lmasligi, kuzatuv kengashi qabul qiladigan qarorga ta'sir ko'rsatishga urinmasligi kerak.

Bank o'ziga aloqador bo'lgan shaxslar bilan tuzilgan bitimlarning alohida ro'yxatini yuritishi va Markaziy bankni bankka aloqador shaxslar bilan bitimlar tuzilishi oldidan xabardor etishi shart.

6-bob. Banklarning faoliyati ustidan prudensial nazorat va nazorat tadbirlari

45-modda. Prudensial nazorat

Oldingi tahrirga qarang.

Bank faoliyatining o'ziga xos tavakkalchiliklarining oldini olish va qisqartirish maqsadida Markaziy bank, basharti banklar va bank faoliyati to'g'risidagi qonunchilik talablariga rioya etilsa, banklar faoliyati ustidan prudensial nazoratni ta'minlaydi.

(45-moddaning birinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Prudensial nazoratni ta'minlash uchun Markaziy bank:

Oldingi tahrirga qarang.

banklar va bank faoliyati to'g'risidagi qonunchilikning prudensial talablariga muvofiq bo'lishi uchun banklar tomonidan foydalaniladigan tizimlar, strategiyalar, tartib-taomillar hamda mexanizmlar ustidan;

(45-modda ikkinchi qismining ikkinchi xatboshisi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

banklarga tahdid solayotgan yoki tahdid solishi mumkin bo'lgan tavakkalchiliklar, oqilona boshqaruv ta'minlanganligi hamda tavakkalchiliklarni muvofiqlashtiruvchi mexanizmlar banklarning kapitali va likvidligi bilan qoplanganligi ustidan;

Oldingi tahrirga qarang.

banklarning tavakkalchilikni boshqarish, shuningdek korporativ boshqaruv jihatidan banklar va bank faoliyati to'g'risidagi qonunchilik talablariga muvofiqligi ustidan nazoratni amalga oshiradi.

(45-modda ikkinchi qismining to'rtinchi xatboshisi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Oldingi tahrirga qarang.

Banklar o'zining banklar va bank faoliyati to'g'risidagi qonunchilikning prudensial talablariga muvofiqligini baholash uchun zarur bo'lgan axborotni Markaziy bankka taqdim etishi shart.

(45-moddaning uchinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Banklarning ichki boshqaruv mexanizmlari, buxgalteriya hisobi va hisobotlarning yuritilishi, shuningdek ma'muriy tartib-taomillari banklarning prudensial talablarga muvofiqligini tekshirish imkonini berishi kerak.

Banklar Markaziy bank tomonidan prudensial talablarga muvofiqlikni tekshirish uchun bitimlar va operatsiyalarni Markaziy bank tomonidan belgilangan qoidalarga muvofiq ro'yxatga olishi shart.

Markaziy bank banklar kapitalining monandligini ularning tavakkalchiliklari sohasidan kelib chiqib baholash uchun ularning faoliyati, tashkil etilishi va ichki jarayonlari to'g'risida axborot olish maqsadida banklar bilan hamkorlik qiladi.

Zarur hollarda Markaziy bank nazorat vazifalarini bajarish uchun tashqi ekspertlarni jalb etishga haqli.

46-modda. Tekshirish va baholash jarayoni

Oldingi tahrirga qarang.

Markaziy bank banklar tomonidan foydalaniladigan tizimlar, strategiyalar, tartib-taomillar hamda mexanizmlarning banklar va bank faoliyati to'g'risidagi qonunchilik talablariga muvofiqligini tekshiradi, shuningdek banklarning mavjud va ehtimoldagi tavakkalchiliklarini, shu jumladan alohida banklar tomonidan bank (moliya) tizimiga xavf soluvchi tavakkalchiliklarni baholaydi.

Ushbu moddaning **birinchi qismida** ko'rsatilgan tekshiruvlar va baholashlarda banklar tomonidan banklar va bank faoliyati to'g'risidagi qonunchilik talablarining bajarilishi zarurligi hisobga olinadi.

(46-moddaning birinchi va ikkinchi qismlari O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Markaziy bank ushbu moddaning **birinchi qismida** ko'rsatilgan tekshiruvlar va baholashlarning natijalari asosida bank faoliyatining ixtisoslashuvi, miqyosi va murakkabligini, shuningdek oqilona boshqaruvning ta'minlanganligi hamda tavakkalchiliklarning o'rni bankning reguliyativ muvofiqlik mexanizmlari, kapitali va likvidligi bilan qoplanganligi darajasini aniqlaydi.

Ushbu moddaning **birinchi qismida** ko'rsatilgan tekshiruvlar va baholashlarni o'tkazish davriyligi va darajasi Markaziy bank tomonidan mutanosiblik prinsipidan, shuningdek bank

faoliyatining tizimdagi ahamiyati, ixtisoslashuvi, miqyosi va murakkabligidan kelib chiqib, davlat organlari va boshqa tashkilotlar bilan kelishuvlarsiz va xabar berilmasdan mustaqil ravishda belgilanadi.

47-modda. Prudensial nazorat dasturi

Markaziy bank har yili banklar faoliyati ustidan prudensial nazorat dasturini tasdiqlaydi, bu dastur quyidagilarni o'z ichiga oladi:

Oldingi tahrirga qarang.

stress-test natijalari moliyaviy barqarorligida sezilarli tavakkalchiliklar mavjud ekanligini ko'rsatgan yoki bank faoliyati banklar va bank faoliyati to'g'risidagi qonunchilik talablariga muvofiq emasligi taxmin qilingan banklar;

(47-modda birinchi qismining ikkinchi xatboshisi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

tizimli ahamiyatga ega bo'lgan banklar;

Markaziy bankning fikriga ko'ra qo'shimcha nazorat qilinishi talab etiladigan banklar.

Prudensial nazorat dasturi:

Markaziy bank tomonidan nazorat vazifalarini amalga oshirish va resurslarni taqsimlash tartibini;

qo'shimcha nazorat qilinishi lozim bo'lgan banklarni aniqlash tartib-taomilini va ushbu moddaning **uchinchi qismiga** muvofiq uni amalga oshirish uchun zarur bo'lgan choralarni;

banklarni tekshirish rejasini o'z ichiga oladi.

Markaziy bank bankning tavakkalchiliklarini baholash natijalarini hisobga olib, quyidagilarni o'z ichiga olgan tegishli choralarni ko'rish mumkin:

bankdagi tekshiruvlarning davriyligini oshirish;

bank tomonidan qo'shimcha hisobotlar taqdim etish;

bank tomonidan biznes-rejaning bajarilishi ustidan qo'shimcha tekshiruvlar o'tkazish;

muayyan tavakkalchiliklar bo'yicha mavzuli tekshiruvlar o'tkazish.

48-modda. Konsolidatsiyalashgan nazorat

Markaziy bank quyidagi hollarda banklar ustidan konsolidatsiyalashgan nazoratni amalga oshirishi kerak:

banklar guruhi tashkil etilganda;

Markaziy bank tomonidan bankni asosiy bank deb yoki asoslangan mulohazalarga ko'ra bank guruhining a'zosi deb belgilaganda.

Bank faqat bitta banklar guruhining ishtirokchisi bo'lishi mumkin.

Oldingi tahrirga qarang.

Markaziy bank samarali hamkorlikni, axborot almashinuvini tashkil etish va konsolidatsiyalashgan asosda samarali nazorat o'rnatish maqsadida boshqa mamlakatlarning bank nazorati organlari bilan (agar mavjud bo'lsa) mazkur mamlakatlarning qonunlari bilan qo'riqlanadigan sirlarga, shaxsga doir ma'lumotlar va konfidensial axborotdan foydalanish tartibiga rioya etgan holda hamjihatlik va hamkorlik to'g'risida yozma kelishuvlar tuzishga haqli.

(48-moddaning uchinchi qismi O'zbekiston Respublikasining 2024-yil 20-sentabrdagi O'RQ-964-sonli Qonuni tahririda — Qonunchilik ma'lumotlari milliy bazasi, 21.09.2024-y., 03/24/964/0736-son — 2024-yil 22-dekabrda kuchga kiradi)

Banklar ustidan konsolidatsiyalashgan nazoratni amalga oshirishning o'ziga xos xususiyatlari Markaziy bank tomonidan belgilanadi.

49-modda. Bankning moliyaviy ahvolini tiklash rejasini

Bank o'zining moliyaviy ahvoli yomonlashgan taqdirda Markaziy bankning talabiga ko'ra uni tiklash choralarni o'z ichiga olgan bankning moliyaviy ahvolini tiklash rejasini (bundan buyon matnda tiklash rejasini deb yuritiladi) ishlab chiqadi hamda ko'rib chiqish va baholash uchun taqdim etadi.

Bank tiklash rejasini har yili yoki bankning tashkiliy tuzilmasida, uning faoliyatida yoki moliyaviy ahvolidan tiklash rejasiga ta'sir etishi mumkin bo'lgan o'zgarishlardan keyin yangilashi kerak.

Bankning tiklash rejasini makroiqtisodiy va moliyaviy inqiroz ko'rinishlarining bank faoliyatiga ta'sirini, shu jumladan tizimga oid hodisalarni va mazkur bank uchun tavakkalchiliklarni o'zida aks ettirishi kerak.

Bankni tiklash rejasini tegishli qarorlar qabul qilinishi kerak bo'lgan holatni aniqlovchi chora-tadbirlar ro'yxatini va ko'rsatkichlarini o'z ichiga olishi kerak.

Tiklash rejasini bank tomonidan taqdim etilgan kundan e'tiboran uch oy ichida Markaziy bank uni ko'rib chiqadi va ushbu rejaning quyidagi mezonlarga muvofiqligini baholaydi:

tiklash rejasida ko'rsatilgan chora-tadbirlar amalga oshirilgan taqdirda, bankning moliyaviy mavqeyini saqlab qolishi va (yoki) tiklashi;

moliyaviy inqiroz sharoitida tiklash rejasida ko'rsatilgan chora-tadbirlarni tez va samarali amalga oshirish, shuningdek bank va moliya tizimiga salbiy ta'sirlarni kamaytirish imkoniyati.

Tiklash rejasini ushbu moddaning **beshinch** qismida ko'rsatilgan mezonlarga muvofiq bo'lmagan taqdirda, Markaziy bank bankdan:

tiklash rejasini qayta ko'rib chiqishni;

tiklash rejasiga Markaziy bank tomonidan belgilangan o'zgartish va qo'shimchalar kiritishni;

tiklash rejasidagi kamchiliklarni yoki uni amalga oshirish borasidagi to'siqlarni bartaraf etish uchun zarur bo'lgan, o'z faoliyatiga kiritiladigan o'zgarishlarni bank tomonidan aniqlashni;

tavakkalchiliklar sohasini kamaytirishni;

bankni qayta kapitallashtirish choralari o'z vaqtida ko'rilishini;

bankni rivojlantirish strategiyasini qayta ko'rib chiqishni;

bank boshqaruvining tashkiliy tuzilmasini o'zgartirishni talab qilishga haqli.

Oldingi tahrirga qarang.

Ushbu modda oltinchi qismining **beshinch** — **sakkizinchi xatboshilarida** ko'rsatilgan chora-tadbirlar, agar ushbu modda oltinchi qismining **ikkinchi** — **to'rtinchi xatboshilarida** ko'rsatilgan chora-tadbirlar tiklash rejasining banklar va bank faoliyati to'g'risidagi qonunchilik talablariga muvofiqligini ta'minlamasa, qo'llaniladi.

(49-moddaning yettinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Banklar guruhining asosiy banki guruh darajasida o'zining moliyaviy ahvoli yomonlashganidan keyin tiklash uchun ko'riladigan chora-tadbirlarni o'z ichiga oluvchi bank guruhini tiklash rejasini ishlab chiqishi kerak.

Oldingi tahrirga qarang.

Banklar guruhini tiklash rejasini banklar va bank faoliyati to'g'risidagi qonunchilik talablariga muvofiq bo'lishi lozim.

(49-moddaning to'qqizinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Bankni tiklash rejasining mazmuniga va yangilanishiga oid talablar, uni taqdim etish va baholash tartibi Markaziy bank tomonidan belgilanadi.

50-modda. Nazoratga doir vazifalar

Markaziy bank nazoratga doir vazifalarni amalga oshirish maqsadida:

banklardan, ularga aloqador shaxslardan va o'z nazorati ostidagi shaxslardan, bank tomonidan outsorsingga berilgan xizmatlar va operatsiyalarni amalga oshiruvchi shaxslardan olingan hisobotlarni, shuningdek boshqa hujjatlarni olish va tekshirishga, axborotga tushuntirish berishni talab qilishga;

banklarning, bank tomonidan outsorsingga berilgan xizmatlar va operatsiyalarni amalga oshiruvchi shaxslarning, shuningdek konsolidatsiyalashgan asosda nazorat qilinishi lozim bo'lgan boshqa shaxslarning faoliyatini tekshirishga;

banklarning axborot tizimlaridan va ma'lumotlar bazasidan foydalanishga haqlidir.

51-modda. Nazorat choralari

Markaziy bank quyidagi hollarda banklardan yoki bank guruhlaridan zudlik bilan zarur choralar ko'rishni talab qilishga haqli:

Oldingi tahrirga qarang.

bankning yoki banklar guruhining faoliyati banklar va bank faoliyati to'g'risidagi qonunchilik talablariga muvofiq bo'lmaganda;

bank yoki banklar guruhi tomonidan keyingi o'n ikki oy davomida banklar va bank faoliyati to'g'risidagi qonunchilik talablarining buzilishi ehtimoli to'g'risida Markaziy bankning mulohazalariga asoslangan axborot mavjud bo'lganda;

(51-modda birinchi qismining ikkinchi va uchinchi xatboshilari O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Oldingi tahrirga qarang.

Markaziy bank tomonidan bankning yoki banklar guruhining faoliyatiga va (yoki) axborot xavfsizligiga va kiberxavfsizligiga ta'sir ko'rsatuvchi tavakkalchiliklar aniqlanganda.

(51-modda birinchi qismining to'rtinchi xatboshisi O'zbekiston Respublikasining 2024-yil 20-sentabrdagi O'RQ-964-sonli Qonuni tahririda — Qonunchilik ma'lumotlari milliy bazasi, 21.09.2024-y., 03/24/964/0736-son — 2024-yil 22-dekabrda kuchga kiradi)

Ushbu moddaning **birinchi qismida** ko'rsatilgan hollarda Markaziy bank bankdan yoki banklar guruhidan:

kapital bo'yicha prudensial normativlarning Markaziy bank tomonidan belgilangan talablardan yuqori miqdorda bo'lishini ta'minlash va saqlab turishni;

korporativ boshqaruvni, tavakkalchiliklarni boshqarishni, ichki nazoratni va bankning moliyaviy ahvolini tiklash rejasini takomillashtirishni;

Oldingi tahrirga qarang.

bankning yoki banklar guruhining faoliyati banklar va bank faoliyati to'g'risidagi qonunchilik talablariga muvofiqligini ta'minlash bo'yicha chora-tadbirlar rejasini taqdim etishni;

(51-modda ikkinchi qismining to'rtinchi xatboshisi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

bankni moliyaviy sog'lomlashtirish, shu jumladan o'z aktivlari tuzilmasini o'zgartirish va xarajatlarini qisqartirish, bankni qayta tashkil etish, bank filialini yoki boshqa bo'linmalarini yopish bo'yicha tadbirlarni bank tomonidan amalga oshirishni;

kapitalga doir talablarni hisobga olgan holda yakka tartibdagi zaxiralash talablarini yoki aktivlarni boshqarish usullarini qo'llashni;

bankning yoki banklar guruhining barqarorligini sezilarli darajada yomonlashtiruvchi tavakkalchiliklarga sabab bo'ladigan ayrim moliyaviy operatsiyalarni amalga oshirishga va ularning infratuzilmasini kengaytirishga nisbatan belgilangan cheklavlarga va (yoki) taqiqqa bank tomonidan rioya etilishini;

bankning faoliyatiga, xizmatlariga, moliyaviy operatsiyalariga va ichki tizimiga xos bo'lgan tavakkalchilikning pasaytirilishini;

sof foydaning bankning ustav kapitalini ko'paytirishga yo'naltirilishini;

aksiyadorlarga yoki qo'shimcha kapital vositalarini saqlovchilarga dividendlar va subordinar qarzlarni bo'yicha foizlar to'lashga doir cheklavlarning va (yoki) taqiqning bajarilishini;

bank xodimlariga sof foydadan foizlar tarzida to'lanadigan mukofot to'lovlari bo'yicha cheklavlarning va (yoki) taqiqning bajarilishini, agar mazkur to'lovlar oqibatida kapitalga doir talablarga bank muvofiq bo'lmasa yoki uning ushbu talablarga muvofiq emasligi ehtimoli bo'lsa;

cheklov amal qilishi davrida tuziladigan (muddati uzaytiriladigan) bank omonatlari bo'yicha bank omonati shartnomalarida belgilangan foiz stavkasi miqdori bo'yicha cheklovni bajarishni;

qo‘shimcha hisobotlar taqdim etilishini;

Oldingi tahrirga qarang.

axborot xavfsizligini va kiberxavfsizlikni ta‘minlash borasida aniqlangan kamchiliklarni bartaraf etish bo‘yicha yuborilgan ko‘rsatmalar ijrosini;

(51-moddaning ikkinchi qismi O‘zbekiston Respublikasining 2024-yil 20-sentabrdagi O‘RQ-964-sonli Qonuniga asosan o‘n to‘rtinchi xatboshi bilan to‘ldirilgan — Qonunchilik ma‘lumotlari milliy bazasi, 21.09.2024-y., 03/24/964/0736-son — 2024-yil 22-dekabrda kuchga kiradi)

bank likvidligiga oid muammolarning oldini olish maqsadida to‘lovlarning uzluksizligi, moliyaviy manbalarning tegishli tuzilmasi hamda aktivlar va majburiyatlarning muddatlar bo‘yicha mutanosibligi uchun zarur bo‘lgan likvid aktivlarning eng kam summasini saqlab turish bo‘yicha majburiyatlarning bajarilishini;

bank kuzatuv kengashi tomonidan aksiyadorlarning navbatdan tashqari umumiy yig‘ilishini o‘tkazishni, aksiyadorlar Markaziy bank tomonidan belgilangan masalalarni, shu jumladan bank kapitalini bankning moliyaviy barqarorligini ta‘minlay oladigan miqdorgacha ko‘paytirish masalasini ko‘rib chiqishni;

bank kuzatuv kengashining bitta yoki undan ortiq a‘zosining vakolatlarini muddatidan ilgari tugatish, boshqaruvining bitta yoki undan ortiq a‘zosini, shuningdek muhim ahamiyatga ega xodimlarini egallab turgan lavozimidan chetlatishini yoki almashtirishini;

bank boshqaruvi tomonidan bir necha yoki barcha kreditorlarning qarzlarni restrukturizatsiya qilishga doir tadbirlar rejasining ishlab chiqilishini;

qo‘shimcha ma‘lumotlarning oshkor etilishini;

Markaziy bankning boshqa ko‘rsatmalari bajarilishini talab qilishga haqli.

Bank kuzatuv kengashi tomonidan ushbu modda ikkinchi qismining **o‘n beshinchi xatboshisida** ko‘rsatilgan talab bajarilmagan taqdirda Markaziy bank aksiyadorlarning navbatdan tashqari umumiy yig‘ilishini chaqirishga va kun tartibini belgilashga haqli.

52-modda. Vaqtinchalik boshqaruvchi

Agar kuzatuv kengashining yoki boshqaruvning bitta yoki bir necha a‘zosini almashtirish bo‘yicha Markaziy bank tomonidan amalga oshirilgan nazorat choralari yetarli emas deb hisoblansa, Markaziy bank:

kuzatuv kengashi va boshqaruv a‘zolari bilan vaqtinchalik ishlashga;

kuzatuv kengashi va boshqaruv a‘zolarini vaqtinchalik almashtirishga;

bankka bitta yoki bir necha vaqtinchalik boshqaruvchini tayinlashga haqli.

Vaqtinchalik boshqaruvchi ushbu Qonun **36-moddasining** talablariga muvofiq bo‘lishi kerak.

Bank aksiyadori, qarz oluvchisi, kreditori yoki bankka aloqador shaxs bankning vaqtinchalik boshqaruvchisi etib tayinlanishi mumkin emas.

Markaziy bank vaqtinchalik boshqaruvchini lavozimga tayinlash va lavozimidan ozod etish, uning vakolatlarini bank ustaviga va ushbu Qonunga muvofiq belgilash bo‘yicha mutlaq huquqqa ega.

Markaziy bank tomonidan belgilangan hollarda vaqtinchalik boshqaruvchining harakatlari Markaziy bank bilan oldindan kelishilishi kerak. Oldindan kelishmay turib amalga oshirilgan harakatlar haqiqiy emas deb hisoblanadi.

Vaqtinchalik boshqaruvchi Markaziy bankka bankning moliyaviy ahvoli va o‘z vakolatlari doirasida ko‘rilgan choralar to‘g‘risidagi hisobotlarni Markaziy bank tomonidan belgilangan muddatlarda, shuningdek amalga oshirilgan ishlar haqidagi yakuniy hisobotni taqdim etadi.

Markaziy bank vaqtinchalik boshqaruvchining zimmasiga ushbu Qonunga muvofiq choralar ko‘rish, shu jumladan bank aksiyadorlarining navbatdan tashqari umumiy yig‘ilishini chaqirish va kapitalni ko‘paytirish to‘g‘risida talab qo‘yish majburiyatini yuklatishga haqli.

Vaqtinchalik boshqaruvchi o‘n ikki oygacha bo‘lgan muddatga tayinlanadi. Bu muddat alohida hollarda Markaziy bank tomonidan uzaytirilishi mumkin.

Bankda vaqtinchalik boshqaruvni amalga oshirish tartibi Markaziy bank tomonidan belgilanadi.

Oldingi tahrirga qarang.

7-bob. Banklar va bank faoliyati to'g'risidagi qonunchilikni buzganlik uchun Markaziy bank tomonidan qo'llaniladigan choralar hamda sanksiyalar

(7-bobning nomi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

53-modda. Choralarning va sanksiyalarning qo'llanilishi

Markaziy bank ushbu Qonunning 54, 55 va 56-moddalarida ko'rsatilgan qoidabuzarliklar uchun javobgar bo'lgan bankka, uning kuzatuv kengashi va boshqaruvi a'zolariga, shuningdek bankning muhim ahamiyatga ega xodimlariga nisbatan choralar va sanksiyalar qo'llashga haqli.

Qoidabuzarliklar qo'pol, jiddiy va juz'iy qoidabuzarliklarga bo'linadi.

Choralar va sanksiyalarni qo'llash tartibi Markaziy bank tomonidan belgilanadi.

Choralar va sanksiyalar qo'llanilganda Markaziy bank quyidagilarni hisobga oladi:

tavakkalchilikning darajasini, qoidabuzarliklarning xususiyatini, miqyosini va oqibatlarini; qoidabuzarliklarning tizimlilikini va davomiyligini;

yo'l qo'yilgan qoidabuzarliklarning moliyaviy holatga ta'sirini;

qo'llaniladigan choralar va (yoki) sanksiyalar natijasida vaziyatni o'zgartirish imkoniyatini;

aniqlangan qoidabuzarliklarning va (yoki) tavakkalchiliklarning yuzaga kelishiga olib kelgan sabablarni;

ilgari qo'llanilgan choralar va sanksiyalarning samaradorligini (natijadorligini);

bank, bevosita va bilvosita aksiyador tomonidan, shu jumladan oxirgi benefitsiar mulkdor, kuzatuv kengashining va boshqaruvning a'zosi, bankning muhim ahamiyatga ega xodimi tomonidan qoidabuzarliklarni bartaraf etishga qaratilgan mustaqil choralar ko'rilishini.

54-modda. Qo'pol qoidabuzarliklar

Qo'pol qoidabuzarliklar jumlasiga quyidagilar kiradi:

litsenziya va ruxsat etish xususiyatiga ega hujjatlarning qalbaki hujjatlardan foydalangan holda olinganligi;

sodir etilishi uchun oldindan Markaziy bankning ruxsatini olish talab etiladigan harakatlarning ruxsat etish xususiyatiga ega hujjatlarni olmay turib amalga oshirilganligi;

bankning yoki banklar guruhining faoliyatidagi qo'pol qoidabuzarliklarni bartaraf etish to'g'risidagi Markaziy bank ko'rsatmalarining belgilangan muddatda bajarilmaganligi;

foydani taqsimlashda ushbu Qonunning 39-moddasida ko'rsatilgan talablarning bajarilmaganligi;

bank ustav kapitali miqdori bank ustav kapitalining eng kam miqdoriga nisbatan belgilangan talabga muvofiq emasligi;

bank yoki banklar guruhi kapitali monandligi koeffitsiyentining olti oydan ko'proq muddat davomida Markaziy bank tomonidan belgilangan yo'l qo'yiladigan eng kam miqdordan sakson foizgacha va undan kamroq foizgacha pasayganligi;

bank aktivlari bo'yicha ehtimoliy yo'qotishlarga qarshi yetarlicha zaxiraning mavjud emasligi;

litsenziyada nazarda tutilmagan moliyaviy operatsiyalar amalga oshirilganligi;

ushbu Qonun bilan taqiqlangan yoki cheklangan faoliyat amalga oshirilganligi;

bankka aloqador bo'lgan shaxslar bilan ancha qulay shartlar asosida bitimlar tuzilganligi;

buxgalteriya hisobining hisobotga oid ma'lumotlar buzilishiga olib keladigan va bankning yoki banklar guruhining haqiqiy moliyaviy ahvolini aks ettirish imkonini bermaydigan qoidabuzarliklar bilan yuritilganligi;

auditorlik tashkilotiga bankning auditorlik tekshiruvini o'tkazish uchun zarur bo'lgan moliyaviy hisobotlar va boshqa moliyaviy axborotlar taqdim etilmaganligi;

Markaziy bank tomonidan nazorat vazifalari bajarilishiga to'sqinlik qilinganligi;

bank xizmatlari iste'molchilarining huquqlari va qonuniy manfaatlari buzilganligi;

Markaziy bankka axborotni taqdim etmaganlik, o'z vaqtida taqdim etmaganlik yoki bankning yoki banklar guruhining to'lov layoqatini yoxud likvidligini baholashni o'tkazishga to'sqinlik qiluvchi buzilgan yoki to'liq bo'lmagan axborot taqdim etilganligi;

oxirgi benefitsiar mulkdorlar to'g'risidagi axborotning oshkor etilmaganligi;

boshqaruvning tashkiliy tuzilmasida, ichki nazoratda, shuningdek tavakkalchiliklarni boshqarish tizimida bankning to'lov layoqatiga tahdid soluvchi yoki zarar ko'rilishiga olib keluvchi nuqsonlarning mavjudligi;

tizimli ahamiyatga ega banklar tomonidan Markaziy bankning bufer kapitaliga oid talablariga rioya etilmaganligi;

bank tomonidan ayrim moliyaviy operatsiyalarni amalga oshirish yoki filiallar ochishga doir cheklovlarga va (yoki) taqiqqa rioya etilmaganligi;

bank tomonidan bankning moliyaviy ahvolini tiklash rejasi taqdim etilmaganligi;

bankning kuzatuv kengashi va boshqaruv a'zolari, shuningdek muhim ahamiyatga ega xodimlarining ushbu Qonunning 36-moddasi talablariga muvofiq emasligi;

Oldingi tahrirga qarang.

bank siri to'g'risidagi qonunchilik, jinoiy faoliyatdan olingan daromadlarni legallashtirishga, terrorizmni moliyalashtirishga va ommaviy qirg'in qurolining tarqatilishini moliyalashtirishga qarshi kurashish to'g'risidagi qonunchilik talablari buzilganligi, shuningdek bank axborot tizimlarida kibertahdid yoki kibernetik xavfsizlik hodisasi vujudga kelishiga olib keluvchi qonunchilik talablari buzilganligi;

(54-modda birinchi qismining yigirma uchinchi xatboshisi O'zbekiston Respublikasining 2024-yil 20-sentabrdagi O'RQ-964-sonli Qonuni tahririda — Qonunchilik ma'lumotlari milliy bazasi, 21.09.2024-y., 03/24/964/0736-son — 2024-yil 22-dekabrda kuchga kiradi)

jiddiy qoidabuzarlik uchun Markaziy bank tomonidan jarima qo'llanilganidan keyin besh yil davomida takroran sodir etilgan xuddi shunday qoidabuzarlik.

55-modda. Jiddiy qoidabuzarliklar

Jiddiy qoidabuzarliklar jumlasiga quyidagilar kiradi:

prudensial normativlarga rioya etilmaganligi, bundan bank ustav kapitalining eng kam miqdoriga oid talablar mustasno;

bank yoki banklar guruhi kapitali monandligi koeffitsiyentining olti oydan ko'p bo'lmagan muddat davomida Markaziy bank tomonidan belgilangan yo'l qo'yiladigan eng kam miqdordan sakson foizgacha va undan kamroq foizgacha pasayganligi;

banklar tomonidan to'lovlarning o'z vaqtida o'tkazilmaganligi;

moliyaviy ahvoli barqaror bo'lmagan qarz oluvchilarning kreditlari restrukturizatsiya qilinganligi;

Markaziy bankning aniqlangan qoidabuzarliklar to'g'risida bank aksiyadorlarining umumiy yig'ilishini xabardor qilishga doir talabi bankning kuzatuv kengashi yoki boshqaruv a'zolari tomonidan bajarilmaganligi;

bankning kuzatuv kengashi yoki boshqaruv a'zolari yoxud muhim ahamiyatga ega xodimlari tomonidan korporativ boshqaruv va mukofotlash siyosatlari bajarilmaganligi;

buxgalteriya hisobini yuritish va hisobotlarni tuzish qoidalari buzilganligi;

Oldingi tahrirga qarang.

xabardor qilish tartibida amalga oshiriladigan faoliyat (harakatlar) Markaziy bankni belgilangan tartibda xabardor qilmay amalga oshirilganligi yoki tugatilganligi;

(55-moddaning birinchi qismi O'zbekiston Respublikasining 2021-yil 12-oktabrdagi O'RQ-721-sonli Qonuniga asosan to'qqizinchi xatboshi bilan to'ldirilgan — Qonunchilik ma'lumotlari milliy bazasi, 12.10.2021-y., 03/21/721/0952-son)

juz'iy qoidabuzarlik uchun Markaziy bank tomonidan jarima qo'llanilganidan keyin uch yil davomida takroran sodir etilgan xuddi shunday qoidabuzarlik.

56-modda. Juz'iy qoidabuzarliklar

Oldingi tahrirga qarang.

Juz'iy qoidabuzarliklar jumlasiga mazkur Qonunning 54 va 55-moddalariga muvofiq qo'pol yoki jiddiy qoidabuzarlik hisoblanmaydigan, banklar va bank faoliyati to'g'risidagi qonunchilik talablariga javob bermaydigan nomuvofiqliklar kiradi.

(56-moddaning matni O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

57-modda. Qo'pol qoidabuzarliklar uchun choralar va sanksiyalar

Qo'pol qoidabuzarliklarni sodir etganlik uchun Markaziy bank:

Oldingi tahririga qarang.

banklar va bank faoliyati to'g'risidagi qonunchilikni buzgan holda amalga oshirilgan moliyaviy operatsiyalardan olingan daromadlarning miqdorini aniqlash imkoni bo'lsa, bankdan ushbu daromadlarning ikki baravari miqdoridan yoki bank tomonidan o'tgan moliya yili davomida olingan sof foydaning besh foizi yoki bank jami kapitalining bir foizi miqdoridan ortiq bo'lmagan miqdorda jarima undirishga;

(57-modda birinchi qismining ikkinchi xatboshisi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

ushbu Qonun 51-moddasining **ikkinchi qismida** ko'rsatilgan choralarni bankka nisbatan alohida holda yoki jamlangan tarzda qo'llashga;

litsenziyani chaqirib olishga;

bank kuzatuv kengashining, boshqaruvining a'zosidan yoki muhim ahamiyatga ega xodimidan jarima qo'llanilayotgan oydan avvalgi bir yil ichida olingan mukofotning yuz foizidan ortiq bo'lmagan miqdorda jarima undirishga;

qoidabuzarliklar, qoidabuzarlarga nisbatan qo'llanilgan choralar va sanksiyalar to'g'risidagi xabarni ommaviy axborot vositalarida e'lon qilishga haqli.

58-modda. Jiddiy qoidabuzarliklar uchun choralar va sanksiyalar

Jiddiy qoidabuzarliklarni sodir etganlik uchun Markaziy bank:

Oldingi tahririga qarang.

banklar va bank faoliyati to'g'risidagi qonunchilikni buzgan holda amalga oshirilgan moliyaviy operatsiyalardan olingan daromadlarning miqdorini aniqlash imkoni bo'lsa, bankdan ushbu daromadlarning bir yarim baravari miqdoridan yoki bank tomonidan o'tgan moliya yili davomida olingan sof foydaning ikki foizi yoki bank jami kapitalining 0,5 foizi miqdoridan ortiq bo'lmagan miqdorda jarima undirishga;

(58-modda birinchi qismining ikkinchi xatboshisi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

ushbu Qonun 51-moddasining **ikkinchi qismida** ko'rsatilgan choralarni bankka nisbatan alohida holda yoki jamlangan tarzda qo'llashga;

bank kuzatuv kengashining, boshqaruvining a'zosidan yoki muhim ahamiyatga ega xodimidan jarima qo'llanilayotgan oydan avvalgi bir yil ichida olingan mukofotning yetmish besh foizidan ortiq bo'lmagan miqdorda jarima undirishga;

qoidabuzarliklar, qoidabuzarlarga nisbatan qo'llanilgan choralar va sanksiyalar to'g'risidagi xabarni ommaviy axborot vositalarida e'lon qilishga haqli.

Banklar tomonidan to'lovlar o'z vaqtida amalga oshirilmagan hollarda Markaziy bank bankning aybi bilan amalga oshirilmay qolgan summaga teng miqdorda jarima solishga haqli.

59-modda. Juz'iy qoidabuzarliklar uchun choralar va sanksiyalar

Juz'iy qoidabuzarliklarni sodir etganlik uchun Markaziy bank:

Oldingi tahririga qarang.

banklar va bank faoliyati to'g'risidagi qonunchilikni buzgan holda amalga oshirilgan moliyaviy operatsiyalardan olingan daromadlarning miqdorini aniqlash imkoni bo'lsa, bankdan

ushbu daromadlardan yoki bank tomonidan o'tgan moliya yili davomida olingan sof foydaning bir foizi yoki bank jami kapitalining 0,1 foizi miqdoridan ortiq bo'lmagan miqdorda jarima undirishga;
(59-modda birinchi qismining ikkinchi xatboshisi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

ushbu Qonun 51-moddasining **ikkinchi qismida** ko'rsatilgan choralarni bankka nisbatan alohida holda yoki jamlangan tarzda qo'llashga;

bank kuzatuv kengashining, boshqaruvining a'zosidan yoki muhim ahamiyatga ega xodimidan jarima qo'llanilayotgan oydan avvalgi bir yil ichida olingan mukofotning ellik foizidan ortiq bo'lmagan miqdorda jarima undirishga;

qoidabuzarga nisbatan choralar va sanksiyalar qo'llanilishi to'g'risida yozma ogohlantirish yuborishga haqli.

8-bob. Banklararo operatsiyalar va mijozlarga xizmat ko'rsatish

60-modda. Banklararo operatsiyalar

Banklar shartnoma asosida pul mablag'larini depozitlar, kreditlar shaklida bir-biridan jalb etishi va bir-biriga joylashtirishi, hisob-kitob markazlari va vakillik hisobvaraqlari orqali hisob-kitoblarni amalga oshirishi hamda litsenziyada nazarda tutilgan boshqa moliyaviy operatsiyalarni bajarishi mumkin.

Markaziy bank sog'lomlashtirish rejimida bo'lgan banklar uchun banklararo operatsiyalar bo'yicha qo'shimcha limitlar belgilashga haqli.

61-modda. Banklar va ularning mijozlari o'rtasidagi munosabatlar

Banklar va ularning mijozlari o'rtasidagi munosabatlar shartnomalar asosida amalga oshiriladi.

Mijozlar o'zlari tanlagan bitta yoki bir necha bankda milliy va chet el valyutasida bank hisobvaraqlari ochishga haqli.

Bank hisobvaraqlarini ochish, yuritish va yopish, shuningdek banklar va ularning mijozlari o'rtasidagi milliy va chet el valyutasidagi hisob-kitoblar tartibi Markaziy bank tomonidan belgilanadi.

62-modda. Kreditlar, depozitlar bo'yicha foiz stavkalari va bank operatsiyalariga oid vositachilik haqi miqdori

Kreditlar, depozitlar bo'yicha foiz stavkalari, bank operatsiyalariga oid vositachilik haqi miqdori bank tomonidan mustaqil belgilanadi.

Bank mijozlar bilan tuzilgan shartnomalar shartlarini, shu jumladan kreditlar bo'yicha foiz stavkalarini va ularni belgilash tartibini, depozitlar bo'yicha foiz stavkalarini, vositachilik haqi miqdorini va ushbu shartnomalarning amal qilish muddatlarini bir taraflama o'zgartirish huquqiga ega emas.

63-modda. Kreditlarning qaytarilishini ta'minlash

Banklar garov, kafolatlar, kafillik, majburiyatlar asosida va majburiyatlar bajarilishini ta'minlashning qonunda nazarda tutilgan boshqa usullari asosida kreditlar beradi.

Oldingi tahrirga qarang.

Qarz oluvchi tomonidan shartnomaga doir majburiyatlar buzilgan taqdirda, banklar taqdim etilgan kreditlarni va ular bo'yicha hisoblangan foizlarni shartnomada nazarda tutilgan tartibda muddatidan ilgari undirishga, shuningdek undiruvni qonunchilikda belgilangan tartibda garovga qo'yilgan mol-mulkka qaratishga haqli.

(63-moddaning ikkinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Oldingi tahrirga qarang.

Yuridik shaxslarning ustav fondidagi (ustav kapitalidagi), ushbu Qonun 7-moddasining to'rtinchi qismida ko'rsatilmagan va uning talablariga muvofiq bo'lmagan aksiyalari hamda ulushlari banklar tomonidan ta'minot sifatida qabul qilinishi mumkin emas.

(63-moddaning uchinchi qismi O'zbekiston Respublikasining 2025-yil 11-fevraldagi O'RQ-1026-sonli Qonuni tahririda — Qonunchilik ma'lumotlari milliy bazasi, 12.02.2025-y., 03/25/1026/0131-son)

Banklar ta'minlanmagan kredit (ishonchga asoslangan kredit) berish to'g'risida qaror qabul qilishi mumkin.

Banklarga o'z aksiyalarini garovga qo'yish evaziga kredit berish taqiqlanadi.

Ushbu moddada belgilangan normalar banklarning kafolatlar berishga oid moliyaviy operatsiyalarni ta'minlashga nisbatan ham tatbiq etiladi.

64-modda. Qarzdorni to'lovga qobiliyatsiz deb e'lon qilish

Oldingi tahrirga qarang.

Bank qarzni to'lash bo'yicha o'z majburiyatlarini bajarmayotgan qarzdorning to'lovga qobiliyatsizligi to'g'risida ish qo'zg'atish haqidagi ariza bilan iqtisodiy sudga murojaat qilishga haqli.

(64-moddaning matni O'zbekiston Respublikasining 2024-yil 21-fevraldagi O'RQ-911-sonli Qonuni tahririda — Qonunchilik ma'lumotlari milliy bazasi, 22.02.2024-y., 03/24/911/0142-son)

9-bob. Bank xizmatlari iste'molchilarining huquqlari va qonuniy manfaatlarini himoya qilish

65-modda. Bank xizmatlarini ko'rsatish

Bank xizmatlarining iste'molchilari bankni va bank xizmatlarini tanlashda erkindir. Banklar iste'molchining talabiga binoan unga bank xizmatlarini ko'rsatish shartlari bilan tanishish imkoniyatini taqdim etishi shart.

Bank shaxsni bankning xizmatidan yoki mahsulotidan foydalanish sharti sifatida bankning yoki o'zga uchinchi shaxsning boshqa bank xizmatidan yoki mahsulotidan foydalanishga majbur qilmasligi kerak.

66-modda. Bank xizmatlari to'g'risidagi axborotni oshkor qilish

Bank xizmatlari ko'rsatishning umumiy shartlari, vositachilik haqi, tariflar va bank xizmatlari ko'rsatganlik uchun foiz stavkalari to'g'risidagi axborot ochiq axborot bo'lib, ular bankning rasmiy veb-saytida e'lon qilinadi. Mazkur axborot tijorat yoki bank sirining predmeti bo'lishi mumkin emas.

Bank xizmatlari ko'rsatish shartnomasi tuzilguniga qadar iste'molchiga ular to'g'risidagi axborotning to'liq oshkor qilinishi ta'minlanishi kerak. Ko'rsatiladigan bank xizmatlarining shartlari va qiymati haqidagi axborotni mijozga taqdim etishni rad qilishga yo'l qo'yilmaydi.

Banklar kredit berish qanday shartlar asosida amalga oshirilayotganligi haqida, shu jumladan kreditning (qarzning) to'liq qiymati to'g'risida mijozga axborot berishi kerak.

Kreditning (qarzning) to'liq qiymati deganda hisob-kitob qilish chog'ida qarz oluvchining kredit (qarz) olish bilan bog'liq to'lovlari hisobga olinadigan ishonchli, yillik va samarali tarzda hisoblab chiqarilgan foiz stavkasi tushuniladi. Kreditning (qarzning) to'liq qiymati hisob-kitobiga qarz oluvchining to'lovlari, shu jumladan uchinchi shaxslar foydasiga to'lovlari, agar qarz oluvchining bunday to'lovlar bo'yicha majburiyati shartnoma shartlaridan kelib chiqsa va (yoki), agar kredit (qarz) berish bunday to'lovlarni amalga oshirishga bog'liq qilib qo'yilgan bo'lsa, kiritiladi.

Bank xizmatlari ko'rsatishning umumiy shartlaridagi o'zgarishlar ular kuchga kirishidan kamida o'n kun oldin bankning rasmiy veb-saytida e'lon qilinishi kerak, shuningdek foiz stavkalarining va valyutalarni ayirboshlash kursining o'zgarishi to'g'risidagi axborot ular o'zgargan kuni e'lon qilinadi.

67-modda. Omonatchilarning huquqlari

O'zbekiston Respublikasining fuqarolari, chet el fuqarolari va fuqaroligi bo'lmagan shaxslar bank omonatchilari bo'lishi mumkin.

Omonatchilar o'ziga tegishli pul mablag'larini omonatlarga joylashtirish uchun bankni tanlashda erkindir va bir yoki bir nechta bankda omonatlarga ega bo'lishi mumkin.

68-modda. Murojaatlarni ko'rib chiqish

Banklar mijozlarning murojaatlarini ko'rib chiqish tartib-taomilini o'z ichiga olgan tartibga ega bo'lishi shart. Mijozlarning murojaatlari bankka kelib tushgan kundan e'tiboran o'n besh kundan kechiktirmay, qo'shimcha o'rganish va (yoki) tekshirish, qo'shimcha hujjatlarni so'rab olish talab etilganda esa bir oygacha bo'lgan muddatda ko'rib chiqilishi va yozma yoki elektron shaklda javob berilishi kerak.

Mijozlarning murojaatlarini ko'rib chiqish natijalariga oid hujjatlar kamida uch yil saqlanishi kerak.

69-modda. Monopoliyaga qarshi qoidalar

Banklarga moliyaviy operatsiyalar bozorini monopollashtirish va bank sohasida raqobatni cheklashga qaratilgan bitimlarga erishish uchun o'z uyushmalaridan va boshqa birlashmalaridan foydalanish taqiqlanadi.

Oldingi tahrirga qarang.

Banklarning monopoliyaga qarshi qoidalariga rioya etishi Markaziy bank tomonidan, shuningdek qonunchilikka muvofiq monopoliyaga qarshi organ tomonidan nazorat qilinadi.

(69-moddaning ikkinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

10-bob. Banklarda hisobga olish, hisobotlar va auditorlik tekshiruvi

70-modda. Banklarda buxgalteriya hisobini yuritish

Banklar buxgalteriya hisobini Markaziy bank tomonidan belgilangan qoidalar asosida ishlab chiqilgan ichki hisob-kitob siyosatiga muvofiq tashkil etadi va yuritadi.

Banklar moliyaviy hisobotlarning xalqaro standartlarini qo'llashi mumkin.

Banklardagi buxgalteriya hisobi:

boshqaruvga, moliyaga, soliqqa va nazoratga oid hisobotning hamda boshqa hisobotlarning ishonchliligini, ularda bankning haqiqiy moliyaviy holati va faoliyati natijalari aks ettirilishini;

bank aktivlarini va yuzaga keluvchi tavakkalchiliklarni boshqarish xavfsizligini;

bank aksiyadorlari va kuzatuv kengashi tomonidan bankning moliyaviy ahvolini va uning mansabdor shaxslarining ishini nazorat qilish imkoniyatini ta'minlashi kerak.

71-modda. Banklarning hisobotlari

Banklar Markaziy bankka moliyaviy va nazorat hisobotlarini taqdim etadi.

Bank o'z faoliyati to'g'risidagi hisobotlarni Markaziy bank tomonidan belgilangan shakllarda, tartibda va muddatlarda tuzadi hamda Markaziy bankka taqdim etadi.

Banklar Markaziy bankning talabiga ko'ra konsolidatsiyalashgan, davriy, shuningdek bir martalik hisobotlarni taqdim etadi.

Bank Markaziy bankka taqdim etiladigan hisobotlarning va boshqa ma'lumotlarning yaxlitligi hamda ishonchliligi uchun javobgardir.

Oldingi tahrirga qarang.

Banklar qonunchilikka muvofiq boshqa turdagi hisobotlarni ham taqdim etadi.

(71-moddaning beshinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

72-modda. Banklar tomonidan moliyaviy hisobotlarni e'lon qilish

Banklar moliyaviy hisobotlarni, banklar guruhining asosiy banki konsolidatsiyalashgan moliyaviy hisobotlarni ularda ko'rsatilgan ma'lumotlarning to'g'riligini auditorlik tashkiloti tasdiqlaganidan keyin Markaziy bank tomonidan belgilanadigan shaklda e'lon qiladi.

Banklar o'z mablag'lariga, kapitalga doir talablarning bajarilishiga, likvidlikka, tavakkalchiliklarning qiymatiga va boshqa muhim ko'rsatkichlarga (normativlarga) doir axborotni oshkor etishi kerak.

73-modda. Bank operatsiyalariga doir hujjatlarni saqlash

Banklar hujjatlarni O'zbekiston Respublikasi Vazirlar Mahkamasi belgilagan tartibda va muddatlarda o'z idoraviy arxivida saqlashi shart.

74-modda. Banklarning va banklar guruhining auditorlik tekshiruvi

Oldingi tahrirga qarang.

Bank va banklar guruhi auditorlik tekshiruvining maqsadi bankning va banklar guruhining moliyaviy axboroti hamda boshqa moliyaviy ma'lumotlari to'g'riligini va buxgalteriya hisobi to'g'risidagi qonunchilikka hamda moliyaviy hisobotlarga oid xalqaro standartlarga muvofiqligini auditorlik tashkiloti tomonidan aniqlashdan iborat.

(74-moddaning birinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Banklarning yillik moliyaviy hisobotlari va banklar guruhining yillik konsolidatsiyalashgan moliyaviy hisoboti auditorlik tekshiruvidan o'tkazilishi majburiydir. Bankning va banklar guruhining auditorlik tekshiruvi Markaziy bankning talabiga ko'ra umuman bankning yoki banklar guruhining faoliyati bo'yicha ham, ular faoliyatining alohida yo'nalishlari bo'yicha ham o'tkazilishi mumkin.

Bankning yillik moliyaviy hisoboti, banklar guruhining yillik konsolidatsiyalashgan moliyaviy hisoboti to'g'risidagi auditorlik xulosasi qonunda nazarda tutilganidan tashqari, auditorlik tashkiloti tomonidan:

bank, banklar guruhi tomonidan hisobot sanasidagi holatga ko'ra prudensial normativlarning bajarilishini;

bankning, banklar guruhining ichki nazorati va tavakkalchiliklarini boshqarish tizimlarining tashkil etilishi Markaziy bank tomonidan qo'yilgan talablarga muvofiqligini tekshirish natijalarini o'z ichiga olgan bo'lishi kerak.

Oldingi tahrirga qarang.

Auditorlik tashkilotlari bankning va banklar guruhining faoliyatini tekshirish natijalariga ko'ra moliyaviy hisobotlarning ishonchliligini va buxgalteriya hisobini yuritish tartibi qonunchilikda belgilangan talablarga muvofiqligini tasdiqlaydi (yoki tasdiqlamaydi), shuningdek bankning yillik moliyaviy hisobotiga, banklar guruhining konsolidatsiyalashgan yillik moliyaviy hisobotiga ilova qilinadigan auditorlik xulosasini beradi.

(74-moddaning to'rtinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Auditorlik xulosasiz bankning yillik moliyaviy hisoboti, shuningdek banklar guruhining konsolidatsiyalashgan yillik moliyaviy hisoboti Markaziy bank tomonidan qabul qilinmaydi va e'lon qilinmaydi.

75-modda. Bankning va banklar guruhining auditorlik tekshiruvini amalga oshiruvchi auditorlik tashkilotiga doir talablar

Oldingi tahrirga qarang.

Bank moliyaviy hisobotining va banklar guruhi konsolidatsiyalashgan moliyaviy hisobotining auditorlik tekshiruvi shtatida Markaziy bankning banklarda auditorlik tekshiruvlarini o'tkazish huquqini beruvchi malaka sertifikatiga ega kamida ikki nafar auditori (auditorlik tashkiloti rahbarini hisobga olgan holda) mavjud bo'lgan auditorlik tashkiloti tomonidan o'tkaziladi.

(75-moddaning birinchi qismi O'zbekiston Respublikasining 2021-yil 12-oktabrdagi O'RQ-721-sonli Qonuni tahririda — Qonunchilik ma'lumotlari milliy bazasi, 12.10.2021-y., 03/21/721/0952-son)

Auditorlik tashkiloti bankka aloqador shaxs bo'lmasligi va uning oldida pul majburiyatlariga ega bo'lmasligi kerak.

Bank bilan (banklar guruhining asosiy banki bilan) auditorlik tashkiloti o'rtasida tuzilgan shartnomalarda auditorlik hisobotining Markaziy bankka topshirilishini cheklovchi qoidalar bo'lmasligi kerak.

Auditorlik tashkiloti:

Oldingi tahrirga qarang.

banklar va bank faoliyati to'g'risidagi qonunchilik talablarining qo'pol buzilishiga olib keluvchi;

(75-modda to'rtinchi qismining ikkinchi xatboshisi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

bank faoliyatiga salbiy ta'sir ko'rsatishi mumkin bo'lgan;

Oldingi tahrirga qarang.

moliyaviy hisobotning ishonchliligi va buxgalteriya hisobini yuritish tartibi qonunchilikda belgilangan talablarga muvofiqligi to'g'risida fikr bildirishni auditorlik tashkiloti tomonidan rad etishga yoki fikrlarni qo'shimcha shart bilan bildirishga olib kelishi mumkin bo'lgan holatlar to'g'risida Markaziy bankni darhol xabardor etishi shart.

(75-modda to'rtinchi qismining to'rtinchi xatboshisi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Markaziy bankning talabiga ko'ra auditorlik tashkiloti auditorlik hisoboti bilan bog'liq qo'shimcha tushuntirishlar taqdim etishi kerak.

Oldingi tahrirga qarang.

Banklarda auditorlik tekshiruvini o'tkazishning o'ziga xos xususiyatlari, auditorning malaka sertifikatini berish tartibi Markaziy bank tomonidan belgilanadi.

(75-moddaning oltinchi qismi O'zbekiston Respublikasining 2021-yil 12-oktabrdagi O'RQ-721-sonli Qonuni tahririda — Qonunchilik ma'lumotlari milliy bazasi, 12.10.2021-y., 03/21/721/0952-son)

Oldingi tahrirga qarang.

10¹-bob. Kredit tashkilotlarining faoliyatini o'zgartirish

75¹-modda. Kredit tashkilotlari faoliyatini o'zgartirishning o'ziga xos xususiyatlari

Quyidagi kredit tashkilotlari o'z faoliyatini o'zgartirishi mumkin:

mikromoliya tashkiloti — mikromoliya banki faoliyatiga;

mikromoliya banki — bank faoliyatiga;

bank — mikromoliya banki faoliyatiga;

mikromoliya banki — mikromoliya tashkiloti faoliyatiga.

Ushbu moddaning **birinchi qismida** nazarda tutilgan kredit tashkilotlari faoliyatini o'zgartirishning o'ziga xos xususiyatlari Markaziy bank tomonidan belgilanadi.

75²-modda. Mikromoliya tashkiloti faoliyatini mikromoliya banki faoliyatiga o'zgartirish

Mikromoliya tashkiloti faoliyatini mikromoliya banki faoliyatiga o'zgartirish orqali mikromoliya bankini tashkil etish ushbu Qonunda belgilangan bank faoliyatiga ruxsat berish shartlariga muvofiq amalga oshiriladi.

Mikromoliya tashkiloti o'z faoliyatini mikromoliya banki faoliyatiga o'zgartirish uchun aksiyadorlik jamiyati tashkiliy-huquqiy shakliga ega bo'lishi kerak.

Mikromoliya bankini tashkil etishga doir dastlabki ruxsatnomani olish uchun ariza beruvchi mikromoliya bankini tashkil etish to'g'risida qaror qabul qilingan kundan e'tiboran o'n ish kuni ichida Markaziy bankka quyidagilarni ilova qilgan holda ariza taqdim etadi:

aksiyadorning (aksiyadorlarning) mikromoliya tashkiloti faoliyatini mikromoliya banki faoliyatiga o'zgartirish orqali mikromoliya bankini tashkil etish to'g'risidagi qarorini;

ushbu Qonun 16-moddasi birinchi qismining **uchinchi, beshinchi — o'n to'rtinchi xatboshilarida** nazarda tutilgan hujjatlarni;

mikromoliya bankining ustav kapitalida chet el banki ishtirok etgan taqdirda ushbu Qonun 17-moddasining **birinchi qismida** nazarda tutilgan hujjatlarni.

Mikromoliya bankini davlat ro'yxatidan o'tkazish va litsenziya olish uchun ariza beruvchi mikromoliya bankini tashkil etishga doir dastlabki ruxsatnomani olganidan keyin olti oydan kechiktirmay Markaziy bankka ushbu Qonun 20-moddasi birinchi qismining **ikkinchi — beshinchi xatboshilarida** nazarda tutilgan hujjatlarni, shuningdek ushbu moddaning **uchinchi qismida** va ushbu Qonun 20-moddasi birinchi qismining **ikkinchi — beshinchi xatboshilarida** nazarda tutilgan hujjatlarning elektron shakldagi ko'chirma nusxalarini taqdim etadi.

Markaziy bank tomonidan mikromoliya bankini davlat ro'yxatidan o'tkazish va litsenziya berish to'g'risida qaror qabul qilingan taqdirda, mazkur qaror qabul qilingan kundan e'tiboran besh ish kuni ichida mazkur qarorni ilova qilgan holda, Markaziy bank mikromoliya tashkiloti faoliyati mikromoliya banki faoliyatiga o'zgartirilayotganligi munosabati bilan mikromoliya tashkilotini Tadbirkorlik subyektlarining yagona davlat reyestridan chiqarish to'g'risida davlat xizmatlari markaziga iltimosnoma kiritadi.

Davlat xizmatlari markazi mikromoliya bankini davlat ro'yxatidan o'tkazish va litsenziya berish to'g'risidagi qaror olingan kundan e'tiboran ikki ish kuni ichida mikromoliya tashkiloti to'g'risidagi yozuvni Tadbirkorlik subyektlarining yagona davlat reyestridan chiqaradi va bu haqda keyingi ish kundan kechiktirmasdan Markaziy bankni xabardor qiladi.

Markaziy bank davlat xizmatlari markazi tomonidan mikromoliya tashkiloti to'g'risidagi yozuv Tadbirkorlik subyektlarining yagona davlat reyestridan chiqarilgan kundan e'tiboran uch ish kuni ichida:

mikromoliya tashkiloti to'g'risidagi ma'lumotlarni mikromoliya tashkiloti faoliyatini amalga oshiruvchi tashkilotlar reyestridan chiqaradi;

mikromoliya bankini davlat ro'yxatidan o'tkazishni amalga oshiradi;

Korxonalar va tashkilotlarning yagona davlat registriga mikromoliya tashkiloti faoliyati mikromoliya banki faoliyatiga o'zgartirilganligi bilan bog'liq o'zgartirishlarni kiritadi; ariza beruvchiga litsenziya beradi.

Litsenziya berilganligi uchun qonunda belgilangan miqdorda davlat boji undiriladi.

Tadbirkorlik faoliyatini amalga oshirish va o'zini o'zi band qilgan shaxslarning daromad olishga yo'naltirilgan faoliyati uchun berilgan kreditlarning kredit portfelidagi ulushi yetmish foizdan kam bo'lgan mikromoliya tashkiloti faoliyatini o'zgartirish orqali tashkil etilgan mikromoliya banki mazkur kreditlarining ulushini o'z faoliyatini o'zgartirgan kundan e'tiboran ikki yil ichida yetmish foizga yetkazishi shart.

75³-modda. Mikromoliya banki faoliyatini bank faoliyatiga o'zgartirish

Mikromoliya banki faoliyatini bank faoliyatiga o'zgartirish:

mikromoliya banki faoliyatini bank faoliyatiga o'zgartirishga doir Markaziy bankning dastlabki ruxsatnomasini olish;

berilgan litsenziyani qayta rasmiylashtirish orqali amalga oshiriladi.

Mikromoliya banki faoliyatini bank faoliyatiga o'zgartirishga doir dastlabki ruxsatnomani olish uchun ariza beruvchi aksiyador (aksiyadorlar) tomonidan faoliyatni o'zgartirish to'g'risidagi qaror qabul qilingan kundan e'tiboran o'n ish kuni ichida Markaziy bankka quyidagilarni ilova qilgan holda ariza taqdim etadi:

aksiyadorning (aksiyadorlarning) mikromoliya banki faoliyatini bank faoliyatiga o'zgartirish to'g'risidagi qarorini;

bankning ustavi loyihasini;

ushbu Qonun 16-moddasi birinchi qismining **beshinchi — o'n to'rtinchi xatboshilarida** nazarda tutilgan hujjatlarni;

bank ustav kapitalida chet el banki ishtirok etgan taqdirda ushbu Qonun 17-moddasining **birinchi qismida** nazarda tutilgan hujjatlarni.

Litsenziyani qayta rasmiylashtirish uchun ariza beruvchi mikromoliya banki faoliyatini bank faoliyatiga o'zgartirishga doir dastlabki ruxsatnoma olingandan keyin olti oydan kechiktirmay, Markaziy bankka quyidagilarni ilova qilgan holda ariza taqdim etadi:

ushbu Qonun 20-moddasi birinchi qismining **uchinchi** va **to'rtinchi xatboshilarida** nazarda tutilgan hujjatlarni;

bankning ustavini ikki nusxada;

bank joylashgan yerdagi Markaziy bank hududiy bosh boshqarmasining bank binolari, ularning muhofaza qilinishi ta'minlanganligi, uskunalar, ishlarni tashkil etish texnika vositalari bilan jihozlanganligi va dasturiy ta'minotining Markaziy bank talablariga muvofiqligi to'g'risidagi xulosasini, bankning joylashgan yeri o'zgargan yoki uning binosi rekonstruksiya qilingan taqdirda;

ushbu moddaning **ikkinchi** va **uchinchi qismlarida** nazarda tutilgan hujjatlarning elektron shakldagi nusxalarini.

Arizani ko'rib chiqish va ariza beruvchini qabul qilingan qaror to'g'risida xabardor etish bankni tashkil qilishga doir dastlabki ruxsatnomani olish, bankni davlat ro'yxatidan o'tkazish va litsenziya berish uchun taqdim etilgan hujjatlarni ko'rib chiqish uchun belgilangan tartibda amalga oshiriladi. Bunda ushbu Qonunning **19** va **21-moddalarida** nazarda tutilgan hollardan tashqari mikromoliya banki tomonidan oxirgi olti oy davomida prudensial normativlarga rioya etilmaganligi mikromoliya banki faoliyatini bank faoliyatiga o'zgartirishga doir dastlabki ruxsatnomani berishni yoki berilgan litsenziyani qayta rasmiylashtirishni rad etish uchun asos bo'ladi.

Markaziy bank tomonidan litsenziyani qayta rasmiylashtirish to'g'risida qaror qabul qilingan taqdirda, Markaziy bank Banklarning davlat reyestriga mikromoliya banki faoliyati bank faoliyatiga o'zgartirilganligi to'g'risidagi tegishli yozuvni kiritadi, shuningdek berilgan litsenziyani qayta rasmiylashtiradi.

75⁴-modda. Bank faoliyatini mikromoliya banki faoliyatiga o'zgartirish

Bank faoliyatini mikromoliya banki faoliyatiga o'zgartirish bankka berilgan litsenziyani qayta rasmiylashtirish orqali amalga oshiriladi.

Litsenziyani qayta rasmiylashtirish uchun ariza beruvchi aksiyador (aksiyadorlar) tomonidan bank faoliyatini mikromoliya banki faoliyatiga o'zgartirish to'g'risida qaror qabul qilingan kundan e'tiboran o'n ish kuni ichida Markaziy bankka quyidagilarni ilova qilgan holda ariza taqdim etadi:

aksiyadorning (aksiyadorlarning) bank faoliyatini mikromoliya banki faoliyatiga o'zgartirish to'g'risidagi qarorini;

mikromoliya bankining ustavini ikki nusxada;

aksiyadorlar ro'yxatini;

mikromoliya bankining kuzatuv kengashi va boshqaruvi a'zolari, shuningdek muhim ahamiyatga ega xodimlari to'g'risidagi ularning ushbu Qonunning **36-moddasida** nazarda tutilgan talablarga muvofiqligini baholashdan o'tkazish uchun zarur bo'lgan axborotni;

mikromoliya banki joylashgan yerdagi Markaziy bank hududiy bosh boshqarmasining bank binolari, ularning muhofaza qilinishi ta'minlanganligi, uskunalar, ishlarni tashkil etish texnika vositalari bilan jihozlanganligi va dasturiy ta'minotining Markaziy bank talablariga muvofiqligi to'g'risidagi xulosasini — bankning joylashgan yeri o'zgargan yoki uning binosi rekonstruksiya qilingan taqdirda;

mikromoliya bankining ustav kapitalida chet el banki ishtirok etgan taqdirda ushbu Qonun 17-moddasining **birinchi qismida** nazarda tutilgan hujjatlarni;

ushbu qismning **ikkinchi** — **yettinchi xatboshilarida** sanab o'tilgan hujjatlarning elektron shakldagi ko'chirma nusxalarini.

Arizani ko'rib chiqish va ariza beruvchini qabul qilingan qaror to'g'risida xabardor etish bankni davlat ro'yxatidan o'tkazish va litsenziya berish to'g'risidagi arizani ko'rib chiqish uchun belgilangan tartibda amalga oshiriladi. Bunda ushbu Qonunning **21-moddasida** nazarda tutilgan hollardan tashqari bank faoliyatini mikromoliya banki faoliyatiga o'zgartirishni rad etish uchun quyidagilar asos bo'ladi:

bank tomonidan oxirgi olti oy davomida prudensial normativlarga rioya etilmaganligi;

bankning to'lovga qobiliyatsizligi yoki to'lovga qobiliyatsiz bo'lib qolish ehtimolining mavjudligi.

Markaziy bank tomonidan litsenziyani qayta rasmiylashtirish to'g'risida qaror qabul qilingan taqdirda, Markaziy bank Banklarning davlat reyestriga bank faoliyati mikromoliya banki faoliyatiga o'zgartirilganligi to'g'risidagi tegishli yozuvni kiritadi, shuningdek berilgan litsenziyani qayta rasmiylashtiradi.

O'z faoliyatini mikromoliya banki faoliyatiga o'zgartirgan bank mikromoliya banki uchun cheklangan moliyaviy operatsiyalarni faoliyati o'zgartirishga qadar tuzilgan shartnomalarni bajarish maqsadida, mazkur shartnomalarning amal qilish muddati tugaguniga qadar, biroq faoliyati o'zgartirish sanadan e'tiboran ikki yildan oshmagan muddat davomida amalga oshirishga haqli. Bunda mazkur shartnomalarda majburiyatning dastlabki belgilangan summasini va shartnomaning amal qilish muddatini o'zgartirish taqiqlanadi.

75⁵-modda. Mikromoliya banki faoliyatini mikromoliya tashkiloti faoliyatiga o'zgartirish

Mikromoliya banki faoliyatini mikromoliya tashkiloti faoliyatiga o'zgartirishga omonatlar (depozitlar) to'liq qaytarilgandan va (yoki) omonatlarga (depozitlarga) kiritilgan pul mablag'larini qaytarish bo'yicha majburiyatlar boshqa bankka o'tkazilganidan keyin yo'l qo'yiladi.

Mikromoliya banki faoliyatini mikromoliya tashkiloti faoliyatiga o'zgartirish uchun ariza beruvchi mikromoliya banki faoliyatini mikromoliya tashkiloti faoliyatiga o'zgartirish to'g'risida qaror qabul qilingan kundan e'tiboran o'n ish kuni ichida Markaziy bankka "Nobank kredit tashkilotlari va mikromoliyalashtirish faoliyati to'g'risida"gi O'zbekiston Respublikasi Qonuni 20-moddasining **birinchi** va **uchinchi qismlarida** nazarda tutilgan hujjatlarni taqdim etadi.

Mikromoliya banki faoliyatini mikromoliya tashkiloti faoliyatiga o'zgartirish uchun taqdim etilgan hujjatlarni ko'rib chiqish "Nobank kredit tashkilotlari va mikromoliyalashtirish faoliyati to'g'risida"gi O'zbekiston Respublikasi **Qonuniga** muvofiq nobank kredit tashkilotlarini hisob ro'yxatidan o'tkazish uchun taqdim etilgan hujjatlarni ko'rib chiqish uchun nazarda tutilgan tartibda amalga oshiriladi.

Markaziy bank tomonidan mikromoliya banki faoliyatini mikromoliya tashkiloti faoliyatiga o'zgartirishga rozilik berish to'g'risidagi qaror qabul qilingan taqdirda, Markaziy bank litsenziyani chaqirib oladi.

Mikromoliya banki mikromoliya bankining faoliyatini mikromoliya tashkiloti faoliyatiga o'zgartirishga rozilik berish to'g'risidagi Markaziy bankning qarori asosida qayta ro'yxatdan o'tish uchun qonunchilikda nazarda tutilgan hujjatlarni davlat xizmatlari markaziga taqdim etadi.

Davlat xizmatlari markazi mikromoliya tashkiloti qayta ro'yxatdan o'tkazilgan kundan e'tiboran ikki ish kuni ichida Korxonalar va tashkilotlarning yagona davlat registriga mikromoliya tashkiloti qayta ro'yxatdan o'tkazilganligi bilan bog'liq o'zgartirishlarni kiritadi.

Markaziy bank Korxonalar va tashkilotlarning yagona davlat registriga o'zgartirishlar kiritilgan kundan e'tiboran ikki ish kuni ichida mikromoliya banki to'g'risidagi yozuvni Banklarning davlat reyestridan chiqaradi va mikromoliya tashkilotini hisob ro'yxatidan o'tkazishni amalga oshiradi.

Mikromoliya banki faoliyatini o'zgartirish orqali tashkil etilgan mikromoliya tashkiloti hisob ro'yxatidan o'tkazilgan kundan e'tiboran ikki yil ichida o'z faoliyatini mikromoliya tashkilotlari faoliyati uchun belgilangan talablarga muvofiqlashtirishi shart.

(10¹-bob O'zbekiston Respublikasining 2025-yil 11-fevraldagi O'RQ-1026-sonli Qonuniga asosan kiritilgan — Qonunchilik ma'lumotlari milliy bazasi, 12.02.2025-y., 03/25/1026/0131-son)

11-bob. Banklarni qayta tashkil etish va tugatish

76-modda. Bankni qayta tashkil etish

Oldingi tahrirga qarang.

Bankni qayta tashkil etish raqobat to'g'risidagi qonunchilikning talablari hisobga olingan holda, aksiyadorlar umumiy yig'ilishining qaroriga muvofiq qo'shib yuborish, qo'shib olish, bo'lish, ajratib chiqarish va o'zgartirish shaklida Markaziy bankning ruxsati bilan amalga oshiriladi. Bankni qayta tashkil etish Markaziy bankning talabiga binoan ham amalga oshirilishi mumkin.

(76-moddaning birinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Davlat yagona ta'sischisi bo'lgan bankni qayta tashkil etish Markaziy bank bilan kelishilgan holda vakolatli organning qarori asosida amalga oshiriladi.

Aksiyadorlar umumiy yig'ilishining bankni qayta tashkil etish to'g'risidagi qarori mavjudligi bankni qayta tashkil etish uchun ruxsatnoma olish to'g'risida Markaziy bankka ariza berish uchun asos bo'ladi.

Markaziy bank bankni qayta tashkil etishni rad etgan taqdirda, aksiyadorlar umumiy yig'ilishining bankni qayta tashkil etish to'g'risidagi qarori haqiqiy emas deb hisoblanadi.

Bankni qo'shib yuborish, bo'lish, ajratib chiqarish shaklida qayta tashkil etish uchun Markaziy bankning ruxsatnomasi olinganidan keyin qayta tashkil etish natijasida yangidan vujudga keladigan har bir bankni davlat ro'yxatidan o'tkazish va litsenziya olish uchun zarur tashkiliy-texnik tadbirlar bajariladi.

Bankni qayta tashkil etish uchun Markaziy bankning ruxsatnomasi olinganligi qayta tashkil etilishi natijasida vujudga keladigan banklarni davlat ro'yxatidan o'tkazish va ularga litsenziya berish uchun kafolat bo'la olmaydi.

Qayta tashkil etilayotgan bank qayta tashkil etish jarayonini Markaziy bankning ruxsatnomasi olingan kundan e'tiboran olti oy ichida tamomlashi shart.

Qayta tashkil etish natijasida yangidan yuzaga kelgan banklarni davlat ro'yxatidan o'tkazish va ularga litsenziya berish Markaziy bank tomonidan belgilangan tartibda amalga oshiriladi.

Bankni qayta tashkil etish tartibi Markaziy bank tomonidan belgilanadi.

77-modda. Litsenziyani chaqirib olish

Markaziy bank quyidagi hollarda litsenziyani chaqirib olishga haqli:

agar bank litsenziyani olganidan keyin o'n ikki oy ichida bank faoliyatini amalga oshirishni boshlamagan, bu faoliyatdan to'g'ridan-to'g'ri voz kechgan yoki moliyaviy operatsiyalarni uch oydan ortiqroq muddat davomida amalga oshirmagan bo'lsa;

litsenziya berish shartlari bank tomonidan bajarilmaganda;

ushbu Qonunning 54-moddasida ko'rsatilgan qo'pol qoidabuzarliklardan biri bank tomonidan sodir etilganda;

agar bank ketma-ket keluvchi uch chorakning har birida bank regulyativ kapitalining o'n foizidan ortiq yoki muddatidan qat'i nazar, regulyativ kapitalning ellik foizidan ortiq miqdorda zarar ko'rgan bo'lsa yoki zarar ko'rish ehtimoli mavjud bo'lsa;

qayta tashkil etish natijasida bankning faoliyati tugatilganda;

aksiyadorlarning umumiy yig'ilishida bankni ixtiyoriy ravishda tugatish to'g'risida qaror qabul qilinganda;

O'zbekiston Respublikasida bank tashkil etgan chet davlat bankidan litsenziya chaqirib olinganda;

Oldingi tahrirga qarang.

Markaziy bank tomonidan mikromoliya banki faoliyatini mikromoliya tashkiloti faoliyatiga o'zgartirishga rozilik berish to'g'risida qaror qabul qilinganda;

(77-moddaning birinchi qismi O'zbekiston Respublikasining 2025-yil 11-fevraldagi O'RQ-1026-sonli Qonuniga asosan to'qqizinchi xatboshi bilan to'ldirilgan — Qonunchilik ma'lumotlari milliy bazasi, 12.02.2025-y., 03/25/1026/0131-son)

bank to'lovga qobiliyatsiz bo'lib qolganda.

Bankning to'lovga qobiliyatsizligi deganda quyidagi hollar tushuniladi:

bank mijozlarning o'ziga nisbatan qo'ygan talablarini o'n besh kun ichida to'lashga qodir bo'lmasa;

bankning majburiyatlari uning aktivlaridan ortib ketisa;

omonatchilar va kreditorlar tomonidan bankka ishonib topshirilgan mablag'larning butligiga xavf soluvchi har qanday boshqa holatlar mavjud bo'lsa.

Bank boshqaruvi bankning to'lovga layoqatsizlik holati yuzaga kelgan yoki mijozlar tomonidan talab etilgan da'volarni qanoatlantira olmaslikka oid tavakkalchilik mavjud bo'lgan hollarda darhol Markaziy bankka xabar berishi kerak.

Markaziy bank boshqaruvining litsenziyani chaqirib olish to'g'risidagi qarori ushbu qaror qabul qilingan paytdan e'tiboran kuchga kiradi.

Markaziy bank boshqaruvining qarori ushbu qaror qabul qilingan kuni bank rahbariyatiga imzo qo'ydirib topshiriladi.

Bankning litsenziyasi chaqirib olinganligi to'g'risidagi axborot mazkur qaror qabul qilingan kundan e'tiboran bir kun ichida ommaviy axborot vositalarida, shuningdek Markaziy bankning rasmiy veb-saytida e'lon qilinishi lozim.

Bankka Markaziy bank boshqaruvining litsenziyani chaqirib olish to'g'risidagi qarori qabul qilingan paytdan e'tiboran ushbu Qonunga muvofiq banklar uchun ruxsat etilgan faoliyatni amalga oshirish taqiqlanadi, bundan bankning tugatilishi bilan bog'liq harakatlar mustasno.

78-modda. Bankning faoliyatini tugatish va bankni tugatish

Bankning faoliyatini tugatish va bankni tugatish ixtiyoriy yoki majburiy (Markaziy bank tomonidan litsenziya chaqirib olinganda) shaklda amalga oshirilishi mumkin.

Bankning faoliyatini tugatish va bankni tugatish uchun:

bank aksiyadorlari umumiy yig'ilishining bankni ixtiyoriy tugatish to'g'risidagi qarori;

Markaziy bank boshqaruvining bankni majburiy tugatish haqidagi qarori asos bo'ladi.

Bankning faoliyatini tugatish va bankni tugatish, shu jumladan ixtiyoriy shaklda tugatish tartibi Markaziy bank tomonidan belgilanadi.

Bankni tugatish Banklarning davlat reyestriga tegishli yozuv kiritilgan kundan e'tiboran tamomlangan deb va bank tugatilgan deb hisoblanadi.

79-modda. Ixtiyoriy tugatish

Ixtiyoriy tugatish bank aksiyadorlari (ishtirokchilari) umumiy yig'ilishining ixtiyoriy tugatish to'g'risidagi qarori asosida, kreditorlar va omonatchilarning talablarini qanoatlantirish imkoniyati mavjud bo'lganda hamda Markaziy bankning ruxsati olinganda amalga oshiriladi.

Bankni ixtiyoriy tugatish to'g'risidagi qaror aksiyadorlarning umumiy yig'ilishida ishtirok etayotgan ovoz beruvchi aksiyalar egalari bo'lgan aksiyadorlar ovozlarning to'rt dan uch qismidan iborat ko'pchilik ovozi bilan qabul qilinadi.

Bank Markaziy bankka aksiyadorlarning umumiy yig'ilishi tomonidan bankni ixtiyoriy tugatish to'g'risida qabul qilingan qaror haqida darhol yozma shaklda xabar berishi shart.

Bankni ixtiyoriy tugatishga ruxsat olish uchun bank aksiyadorlar umumiy yig'ilishining mazkur qarori qabul qilinganidan keyin besh kundan kechiktirmay Markaziy bankka quyidagi hujjatlarni ilova qilgan holda ariza beradi:

bankni tugatish to'g'risida aksiyadorlarning umumiy yig'ilishi tomonidan tugatish sabablari ko'rsatilgan holda qabul qilingan qaror;

aksiyadorlarning umumiy yig'ilishi tomonidan tasdiqlangan, tugatish jarayonini, kreditorlarning va omonatchilarning talablarini qanoatlantirish tartib-taomillari va muddatlari doirasidagi tashkiliy-amaliy chora-tadbirlarni o'z ichiga olgan tugatish rejasi;

ixtiyoriy tugatishga ruxsat berish to'g'risida Markaziy bankka ariza bilan murojaat etilgan paytdagi talablarni qanoatlantirish uchun mablag'lar yetarli ekanligini tasdiqlovchi balans hisoboti; tugatish komissiyasining tarkibi to'g'risidagi axborot va boshqa zarur ma'lumotlar.

Bankni tugatish komissiyasi oldindan Markaziy bank bilan kelishilgan holda aksiyadorlarning umumiy yig'ilishi tomonidan tayinlanadi. Agar tugatish komissiyasi tayinlanmagan bo'lsa, bankni tugatish bo'yicha komissiya Markaziy bank boshqaruvining qarori bilan tashkil etiladi.

Tugatish komissiyasining rahbari va a'zolari ushbu Qonunning **36-moddasi** talablariga muvofiq bo'lishi lozim.

Markaziy bank bankni ixtiyoriy tugatishga ruxsat berish to'g'risidagi arizani olgan kundan e'tiboran ikki oy ichida taqdim etilgan hujjatlarni ko'rib chiqadi va quyidagi shartlar bajarilgan bo'lsa, bankni ixtiyoriy tugatish uchun ruxsat beradi, agar:

Oldingi tahrirga qarang.

bankni ixtiyoriy tugatish to'g'risidagi qaror qonunchilikka muvofiq qabul qilingan bo'lsa;
(79-modda yettinchi qismining ikkinchi xatboshisi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

bank to'lovga layoqatli bo'lsa;

bank tomonidan taqdim etilgan hujjatlarda to'liq va yetarli ma'lumotlar mavjud bo'lsa;
taqdim etilgan tugatish rejasi kreditorlar va omonatchilarning talablari to'liq qanoatlantirilishi uchun imkoniyatlar bo'lishini ta'minlasi;

bank Markaziy bankning so'rovnomasiga ko'ra bankni ixtiyoriy tugatishga ruxsat berish shartlari bajarilganligini aniqlash uchun zarur bo'lgan qo'shimcha hujjatlarni belgilangan muddatda taqdim etgan bo'lsa.

Markaziy bank salbiy qaror qabul qilgan taqdirda ixtiyoriy tugatishga ruxsat berish rad etilgani to'g'risidagi asoslantirilgan qarorni bankning kuzatuv kengashiga yetkazadi. Zarur hollarda Markaziy bank tugatish rejasi va jadvalining qayta ko'rib chiqilishini yoki qo'shimcha hujjatlar va axborot taqdim etilishini talab qilishi mumkin.

Markaziy bank ixtiyoriy tugatish uchun ruxsat berganidan keyin bank litsenziyasini chaqirib oladi.

Agar ixtiyoriy tugatish jarayonida bank to'lovga layoqatsiz ekanligi aniqlansa, tugatish komissiyasi zudlik bilan Markaziy bankka xabar berishi hamda bankning moliyaviy ahvolini tasdiqlovchi tegishli hisobot va hujjatlarni taqdim etishi kerak.

Markaziy bank ushbu moddaning **o'ninchi qismida** ko'rsatilgan hujjatlarni ko'rib chiqadi va ushbu Qonunning 77-moddasi **ikkinchi qismida** ko'rsatilgan asoslardan birontasi mavjud bo'lgan taqdirda, bankning to'lovga layoqatsizligi to'g'risida qaror qabul qiladi va majburiy tugatish jarayonini boshlab yuboradi.

80-modda. Majburiy tugatish

Bank Markaziy bank boshqaruvining litsenziyani chaqirib olish to'g'risidagi qarori asosida majburiy tugatiladi.

Bankni majburiy tugatish chog'ida tugatish komissiyasi Markaziy bank tomonidan tayinlanadi.

Markaziy bank tugatish komissiyasi tarkibiga Markaziy bank xodimlarini kiritishga haqli.

81-modda. Tugatish komissiyasining vakolatlari

Tugatish komissiyasi tayinlangan paytdan e'tiboran bank ishlarini boshqarish bo'yicha, shu jumladan bank aksiyadorlarining umumiy yig'ilishi, kuzatuv kengashi va boshqaruvi vakolatlari ushbu komissiyaga o'tadi.

Tugatish komissiyasi tayinlangan sanadan e'tiboran ikki kun ichida ommaviy axborot vositalarida, shuningdek bankning rasmiy veb-saytida bank tugatilganligi, shu jumladan uning omonatchilari va kreditorlari tomonidan talablarni qanoatlantirish to'g'risidagi arizalarni berish tartibi va muddatlari to'g'risidagi e'lonni chop etishi shart. Talablarni taqdim etish muddati bank tugatilganligi to'g'risidagi xabar e'lon qilingan kundan e'tiboran ikki oyni tashkil etadi va mazkur muddat tugaganidan so'ng tugatish komissiyasi tomonidan talablar qabul qilinmaydi.

Oldingi tahrirga qarang.

Tugatish komissiyasi qimmatli qog'ozlar bozori to'g'risidagi qonunchilikka muvofiq axborotni ham oshkor qilishi kerak.

(81-moddaning uchinchi qismi O'zbekiston Respublikasining 2021-yil 21-apreldagi O'RQ-683-sonli Qonuni tahririda — Qonunchilik ma'lumotlari milliy bazasi, 21.04.2021-y., 03/21/683/0375-son)

Tugatish komissiyasi litsenziya chaqirib olingan kundan e'tiboran ikki oy ichida kreditorlarni aniqlash hamda debitorlik qarzlarni va Markaziy bankning majburiy zaxiralar

jamg'armasida depozitga qo'yilgan mablag'larni olish choralari ko'radi. Mazkur mablag'lar birinchi navbatda tugatilayotgan bankning qarzlari jismoniy shaxslarning talablari asosida to'lashga qaratiladi, bundan bankka aloqador bo'lgan shaxslar mustasno.

12-bob. Yakunlovchi qoidalar

82-modda. Nizolarni hal etish

Oldingi tahrirga qarang.

Bank va uning mijozlari o'rtasidagi nizolar qonunchilikda belgilangan tartibda hal qilinadi.
(82-moddaning matni O'zbekiston Respublikasining 2021-yil 21-apreldagi O'RQ-683-sonli *Qonuni tahririda* — *Qonunchilik ma'lumotlari milliy bazasi*, 21.04.2021-y., 03/21/683/0375-son)

Oldingi tahrirga qarang.

83-modda. Banklar va bank faoliyati to'g'risidagi qonunchilikni buzganlik uchun javobgarlik

Banklar va bank faoliyati to'g'risidagi qonunchilikni buzganlikda aybdor shaxslar belgilangan tartibda javobgar bo'ladi.

(83-modda O'zbekiston Respublikasining 2021-yil 21-apreldagi O'RQ-683-sonli *Qonuni tahririda* — *Qonunchilik ma'lumotlari milliy bazasi*, 21.04.2021-y., 03/21/683/0375-son)

(*Qonun hujjatlari ma'lumotlari milliy bazasi*, 06.11.2019-y., 03/19/580/3994-son; 07.01.2020-y., 03/20/600/0023-son; *Qonunchilik ma'lumotlari milliy bazasi*, 21.04.2021-y., 03/21/683/0375-son, 12.10.2021-y., 03/21/721/0952-son; 20.04.2023-y., 03/23/831/0219-son; 29.11.2023-y., 03/23/880/0905-son; 07.02.2024-y., 03/24/905/0106-son; 22.02.2024-y., 03/24/911/0142-son; 21.09.2024-y., 03/24/964/0736-son; 12.02.2025-y., 03/25/1026/0131-son)